



皇明文衡卷之六十一

傳

錢可大傳

梁潛

可大名珙姓錢氏本吳越王鏐之後歷廬陵刺史匯再世曰和自廬陵徙吉水又四世曰程程之子誠可皆以科第有聲而可大之祖本和號梧岡先生者尤篤行之士也可大生於八月而孤稍長性穎敏年十三以書經中臨江路賞試既又中撫州路賞試然是時元祚日非紅巾盜起所在皆爭為雄長自至正丁酉五六年士大夫顛顛甚矣可大奉其祖及其毋崎嶇以避之走廬陵之富田遷泰和之梅岡既又走其邑之大洲尋又奔雷川最後奔廬陵之李坑李坑路極險盜又追及之梧岡被鎗不死縛之以行可大聞即冒白刃奔許乞

以身代盜并執之可大訢不已梧岡亦哀訴其無子唯此一孫耳兩人因爭相代死情亦悲慘賊憐其意遂兩釋之可大方脫時其母尋亦被執而可大妻張氏被執伏叢薄中窺見賊已執其姑即自出迎謂賊曰我姑老矣請釋姑而縛我賊熟視良久即解縛其姑縛張氏張氏既就縛擲所携袖中雙鞋與其姑訣曰婦無用此矣且行且睥睨其姑稍遠即罵賊不復肯行遂死之變故倉卒之頃而一時憤然求死以全生者若素約然何其可悲也

國朝兵定有司以可大之賢凡三薦之皆以親老辭親既沒終身為之悲痛梧岡故所築樓可大每一登之輒流涕因名之曰思樓其孝行篤至世蓋少見也然其為人頗豪健既以氣自負鄉有劇寇嘗殺人有司憚不敢捕以屬可大

立捕殺之年若干卒于家一子曰遂志今以科第得官為

東按察僉事云

贊曰吾嘗過錢氏所居其地今所謂錢塘者愛其山水清曠因登高而望焉其南數十里外峻峯躍起視衆山特高云其北即宋丞相文信公故居也諸老人言丞相往事與史傳所記殊異因言可大之避亂也居其山下寂久其被執也亦幾不免余既壯其山川又聞可大之事思見其人而不可得也因為之傳云

徐孟昭傳

公諱旭字孟昭姓徐氏饒之樂平人其先南昌人也居樂平者十七世世以儒為業公幼穎悟稍長從其鄉先生蔡仲淵授春秋為文辭已超詣拔出現者皆奇之年三十一登洪武

乙丑科進士第行浙江道監察御史入為禮科庶吉士日記
事侍

上左右

上方屬意天下進士每朝羣臣退獨進士留被顧問

上未退不得退也一日

上呼公至前將有所任使而公奏對弗克稱旨

上以其迂也命分教于涿州之房山復教諭鳳陽皆以憂

去服闋擢

安王府統善用薦為者陞為知州入史館上書論天下事多不

能合公益落落自殊無所顧惜遂自史館出為考功員外郎

及

今上即位遷郎中預修

高皇帝實錄明年拜朝列大夫國子祭酒文明年羅為翰

修撰以卒公在

高帝時素以篤學見稱數言事切中當時

高帝嘉納之然欲老其才故抑之久而未有以用之也及在

考功拒請託抑僥倖是是非非毫髮無所遁其情而尤以謂

天下之治與教在守令與教官守令教官弗稱其任者尤精

覈之無少貸眾望風誼騰公持之益堅及在太學亦如在考

功時然公純謹君子也雖盛威嚴而中情簡質好惡出乎其

至誠至於卓卓自守激之而不動挫之而不撓人未有過之

者也居太學僅一年諸生凜凜僅自修飾而其俗屬之不便

者已諱然議之矣悼之者方側目於下忌之者又背沮之於

其私至相與揶揄其所為公以此竟罷改雲南參議君子莫

不惜之及 陛見

上察其無他特命除翰林脩撰俾預脩永樂大典為副總裁
方向用之而公卒矣時年五十二

上聞之悼惜勅賜棺以斂遣禮部主事端禮諭祭焉公蓋終
身坦夷不事表襮而其嫉惡剛勁人有所不堪者世以此高
之而亦以此與之齟齬者衆也其為學明於義利之辯為文
約而明喜薦士所薦最多且賢屢考試科舉其得士最盛而
尤孝於其親自鳳陽考試河南時入

朝告歸省其母疾方亟公聞倍道疾趨至家母疾忽為之愈
數日竟卒人以為孝感所致云

贊曰考功與大司成皆 國家要職非得才賢譽望之士以
居之誠不可也然而信道明義為行如公者往往猶難之豈

天下豪傑羣居之地是非好惡所聚非素有驅駕籠策之才
者終不足以聘即自公在太學與考功人情固多不附也及
其歿已久相與稱賢考功與賢司成者必曰公事須久而後
定亦理之常然無足怪者猶念

聖上於賢士大夫保全覆護如公者蓋有無窮之

恩焉予素知公恐其久而失之也因取其行事而論次之

蔣用文傳

陳繼

蔣用文名武生以字行其先居魏州五世祖安中金國子助
教以直諫不納棄官攻醫曾祖應茂徙楊之儀真祖夢雷元
楊州路醫學教授父伯雖舉進士崇明州判洪武初召為史
官以疾辭出為蘭陽丞用文少穎悟讀書過目成誦六歲事
學從里中師有贈師萬年松者命賦詩即就曰使者來西嶽

採松云萬年佳名雖自好何不長參天師驚喜曰是兒已見不器既而隨父宦寓日俟公暇持所業質之聞說無疑問父大奇之曰吾有嗣矣父歿歸儀真舊業廢於兵燹渡江占籍句容採山構室居之大肆力於經籍久之得聖人深意乃習醫家言會同黜異約其要而綜之取正於術之精善者而受其秘於是決死生定緩速治效無一不中者由是用文之名驅四方矣孝事母魏夫人情依依不去左右食飲非躬治弗進夫人病被衣而不交睫者數月夫人老郡縣交辟不就曰吾不能舍一日養以趨祿利也夫人歿當洪武中始受薦入太醫院時朱彥脩弟子戴原禮為院使檀其術人無有當其音者見用文喜曰君儒而為醫昌吾道必矣遂言於上授御醫未幾八年陞院判典幹成勞僚類所歸

宗皇帝在青宮用文日侍左右承 顧問隨事獻規益甚九 親禮嘗問保和之要對曰在養正氣正氣完邪氣無自而入又問卿醫效率緩何也對曰善治者必固本急之恐傷其本聖人所以戒欲速也

仁宗稱善及課績特 命光祿置宴於院宴之旌其忠勤又嘗 命工部為營第用文入扣顙謝曰臣荷 恩德萬不一報又敢靡公費以益愧悚也再謝乃止其就故人居之一室蕭然晏如也用文病且革手自為啓附 進有曰臣老病死不足言惟恨不能有報 大恩伏願清心寡欲慎加保養以

輔 聖治以安萬姓

仁宗得啓驚嘆親御寶翰遣使慰問及卒 命兵部給驛舟還其喪督治祠墳於中官

仁宗卽位詔贈奉議大夫太醫院使特謚恭靖遣官
諭祭官其長子主善爲院判用文醇厚恭謹知當世之要務
其忠誼愛

君之心惓惓於語言故能受知於

上所以慰問誥祭之辭皆懷念忠誠揄揚學術以明
上之不忘也居兩京三十年王公貴人下逮賤隸細氓愈其
疾而著神效者歲不少貧者報之曰吾非爲報爲爾醫也卒
皆不受善交友始終不渝宗戚尤洽恩義獎勵後進汲汲人
過耻出其口志嗜學雖老不厭治一室於公署之傍者顏曰
緝熙於家居幽屏之所者顏曰靜學皆盛貯羣籍暇輒翫閱
其中時忘食寢或謂曰子老矣何勤益至是耶用文曰昔衛
武公年數九十五猶箴傲於國俾臣下朝夕交相告刑乃作

抑詩以自儆卒謚睿聖武公吾雖老幸未就木而敢以念荒
棄厥躬哉或又曰緝熙靜學意有說乎用文曰學有緝熙于
光明成王之言也非靜無以成學諸葛武侯之言也吾志在
是其爲詩文有靜學齋集若干卷泚效方論若干卷卒之日
無貴賤疏戚咸咨嗟悼傷曰善人亾矣子四人主善主敬主
孝主忠皆立行有父風

竹軒劉先生傳

王英

先生姓劉氏諱亨字嘉會號竹軒其先居安城之密湖宋豫
州刺史斌徙廬陵石塘里斌曾孫江寧司戶滂又自石塘徙
其邑銅溪高祖哲甫知汀州曾祖景春元海南鹽場司丞祖
貴翁父樂山先生端敏勤學泰和陳心吾劉允中特稱名儒
先生從之遊通詩書二經博究諸史百氏之書洪武壬戌以

賢人君子徵力辭親老後舉經明行脩陳古今政治之要
太祖皇帝嘉之命進講華蓋殿以言事忤執政者出爲壽州
學訓導戊寅冬上疏言六卿秩當與五軍都督相埒國子祭
酒秩不當在太僕卿下又言將臣子弟生長富貴習爲驕侈
他日安可授官宜立武學教訓使知禮義以變其習俗陞常
州武進縣丞爲政廉勤脩學校躬課諸生讀書表其民之有
節義者毀淫祠禁絕妖妄作善教坊再思亭以勉已勸俗百
里之內弦歌相聞三年書最天曹

上褒以璽書壬午縣民李德懋等作亂先生自郡守每令滋
蔓率衆擒首惡而諭降其黨方是時

太宗皇帝初嗣大統遣使勞以金幣先生之名由是揚於遠
邇無何以事罷還鄉屢有薦者先生輒辭宣德中監文淵堂

尹崇高力薦先生雖老猶可爲學校師表至京以年將八十
辭

宣宗皇帝曰伏生九十尚傳經八十豈不可爲教官先生辭
益力

上曰老者安之孔子之言也朕允其請令歸故鄉先生歸怡
然自得居則深衣幅巾列圖史左右日吟咏不輟而動必蹈
於禮於事有合義者必見諸行族弟夢華三喪不能舉先生
爲治塋又以近舍山數十畝爲鄉里貧者塋人名之曰義山
歲旱先生禱輒雨所居多種竹學者稱之曰竹軒先生卒年
八十有幾所著有竹軒集寫心集隨寓錄子習之舉懷才抱
德爲廣東按察司照磨孫同履誦經綸綱同登己未進士第
授浙江義烏縣知縣

論曰自昔名人仕而功業顯著者多載史傳而唐之王友貞
孟詵白履忠諸人者以才學入仕未至大顯既罷去則隱而
終身焉豈有功業可稱哉而史亦傳之蓋以其志恬退不貪
名嗜利祿耳若先生之學行用之固可有為中乃不偶雖屢
薦再起而仕非所願視友貞輩夫何遠哉君子之論人必有
取於斯故著之為傳云

尚書王文安公傳

陳敬宗

公諱英字時彥別號泉坡其先太原人祖宗達宋迪功郎仕
于臨川遂家金谿會祖頤貞元季以書經魁江右入
國朝退隱于家祖子武父脩本並以儒行稱母曾氏公生十
一歲而失怙母淑人以教以比遊業邑庠刻苦嗜學登永樂
甲申進士第時

太宗文皇帝方銳意育才命翰林學士解縉選進士穎秀
者與狀元會聚特通得如二十八宿人之數俾及讀文淵閣
古今書作為班馬韓柳歐蘇文字命大官日給珍饌月賜燈
油之費數召至便殿問以經史諸子故實或至抵暮方退公
在二十八人之中每為濟輩所推讓後

上以綸綍事重以公與今冢宰王直皆慎密可與任並揀入
秘閣書進呈機密奏疏歲戊子預修

太祖高皇帝實錄丁亥授翰林脩撰扈蹕巡狩北京丙申陞
翰林侍講戊戌實錄成賜襲衣綵段鈔錠壬寅胡寇犯邊二

月

上親征公扈從至闊橐兒海五月旋師過威虜鎮李陵城已
四十里

上召公曰聞李陵城有石碑可往視之復遣錦衣衛官校隨之以行時城中被虜殺掠燒毀一空惟城北門有石出尺餘掘土拭磨觀之額曰李陵臺驛令謝君德政之碑其文畧可讀其陰刻達魯花赤等官姓名明日公備奏其故上曰此碑既鐫有鞞鞞姓名異日胡虜見之必以此地為已物爾宜再往擊碎之用火煨沉之於河以絕其爭端公如旨而往既還奏

上喜謂公曰秀才是二十八人讀書者朕需爾為用正好宣力勿憚勞苦因問曰朕率師伐虜爾試言成功如何公對曰胡寇犯邊罪在不宥但聞天兵親征必遠走漠北臣願陛下幸毋入險窮追也上笑曰朕為天下國家計秀才之言惟不欲窮兵黷武耳復

謂曰凡軍中一切動靜或謠言之類爾有所聞即來密奏又諭太監孟驥曰秀才有事即令入見毋阻六月

上駐驛安平鎮立功官軍因有過不與口糧者多相聚悲泣曰吾等糧盡必死道路矣公以為言且曰此皆壯士也願陛下宥其過而與之恩則異日必得其死力

上悅即命兵部尚書李慶人給口糧并載衣甲驢一疋甲辰上復親征胡虜還次榆木川晏駕時

仁宗皇帝在東宮命尚書蹇義夏原吉學士楊榮楊士奇侍讀王直與公同定喪禮議國政宿內閣凡七日

仁宗皇帝嗣位加恩賜白金綵段八月進秩侍講學士尋陞右春坊大學士兼翰林侍講學士明年乞歸省賜鈔二千緡俾馳傳而還

宣宗皇帝卽位嘗召入便殿謂曰洪武中學士有宋濂吳沈未善劉三吾永樂初則解縉胡廣俱有重名念汝當講經史陳道義以啓沃朕心罔俾前人獨專其美賜內醢及鈔千緡命入內閣叅預中秘書奏乞分俸養母于家上允其請宣德庚戌脩

太宗仁宗兩朝寶錄成賜白金綵幣襲衣陞詹事府少詹事兼翰林侍講學士復賜金相琥珀麒麟帶壬子正月聞太淑人曾氏喪

上命禮部賜祭工部造墳遺中官阮童護公奔喪冬十月奉哀還朝寵遇日隆不時召對正統間開經筵公爲講官陳說詳明於文義之外多有規諫之語其講章於朝退之際人爭求去以爲珍寶脩

宣宗皇帝實錄與少師楊士奇楊榮同爲總裁實錄成賜白金百兩綵段鞍馬進秩禮部左侍郎兼翰林侍講學士癸亥正月奉旨出理部事講官如故乙丑荆江台寧等府民遭疫死其衆

上遣公齎香幣往祀南鎮以禳民癘時浙間久旱公至紹興大雨水深二尺灌獻之夕雨止星見明日又大雨田野沾足人皆喜曰此侍郎雨也布政使孫原貞等陪祀請作御祭感應記刻石于廟而還丙寅公奏京師去冬少雪今年自春徂夏雨澤不降種不入土小民缺食此皆臣等政事不脩激怒上蒼所致伏望陛下施賑卹之恩臣等宜益省愆戒飭仍乞齋沐祈禱以格天心

上從其言果大雨五日先是公奏請致仕不許至是年七十

復上章乞罷政吏部言公精力未衰

上是其言不久戊辰八月

上特旨陞公南京禮部尚書明日謝恩畢內傳旨曰

上以卿久仕先朝多效勤勞陞秩南京得安佚既視事南

京二年得疾而終是為景泰元年五月十七日也春秋七十

有五訃聞

上悼惜賜諡文安命禮部賜祭工部造墳公在翰林屢為會

試考官海內名士多出門下為文章典瞻朝廷制作經其

筆居多四方求金石銘誌碑記者接踵其門公酬應不倦詩

歌字書人罕能及

論曰撫州多出名儒顯官若宋之晏殊王安國元之吳澄虞

伯生諸君子其文章名位功業皆炳然當世而垂耀於萬世

豈偶然哉玉筍寶蓋諸名山秀氣之所鍾也公亦撫之人也

其文章名位功業莫不相似然自入仕歷官通顯不離

朝廷四十五年而

列聖眷遇又益不衰於此則似過之矣天之生賢私於撫之

人哉柳執知公之才德自足致身於青雲之上也

黃氏母子賢孝傳

李賢

黃氏名文父鉉江西新喻人永樂癸巳徙河間之任丘娶孫

氏生文甫一歲商於南陽之鄧州守禦所百戶李興見鉉文

雅以女妻之未幾歸任丘李氏與孫氏相戾間達於興興遣

人取其女還鉉亦隨往時孫氏年二十有四文方四歲鉉別

後音問不通孫氏與文母子二人零丁孤苦人不能堪而孫

氏奮志成家勤力紡績夜以繼日以供力役之征周衣食之

費撫育其子年及成童謂所親曰吾聞子弟讀書可以起家
今吾備嘗艱辛幸有此子若遣入邑庠以勛其夙天其或者
憐吾志乎所親曰此意固善第念爾一子之外更無紀綱之
僕子若在官凡百費用尤倍於昔吾恐爾之艱辛未艾也孫
乃愀然泣下曰吾已慮之熟矣顧處子之計莫良於此雖倍
艱辛安敢辭同編之人聞之勃然怒曰吾代爾子力役父矣
今幸其長不吾累焉而又悅之可乎雖懇情乞惠拒之益堅
孫氏憂鬱食不下嚥已而會所親達其情于有司始獲入庠
孫氏且喜且懼愈極力生業勵子進學而此從師親友之需
未嘗少乏文亦感激遵母之訓潛心經史但自幼父去嘗問
母曰吾父安在母曰汝父世家江西為商河南吾亦不知其
所棲矣於是母子相顧潸然山以悲正統己巳文以成材

貢入太學會天下士子講習一日言及其父不知所在有同
舍生玉綱者鄧州人聞其父名曰吾州百戶李興有壻卽此
名也非汝父乎文因思母所云大喜曰是也景泰初以謁告
歸省至家卽白於母徑詣鄧州訪父果在內鄉板橋鉉離其
子已三十四年矣一見痛絕方蘇親屬會晤悲喜交集留數
月不能同行文復辭父入監天順改元夏吏部掄才以文為
兗州府通判乃奉母抵任視篆後卽遣人迎父就祿以養父
時年八十有五憚於遠涉再迎不起至三母曰汝之孝心盡
矣彼有所戀不可再迎文悲思不已曰吾父不來吾卽棄官
而往闔府官僚咸跪請其母母亦悲感而許之一時見者無
不沾襟乃以安車迎至鉉離孫氏已四十四年矣妻子父母
始得會合以遂天倫之樂嗟夫黃氏母子其賢孝矣哉向非

孫氏之賢其子未必成立以有今日非文之孝其父未必會
合以獲祿養遂使零丁孤苦之室變為團欒歡慶之堂予親
見其事因為作傳以告於來世

皇明文衡卷之六十一

皇明文衡卷之六十二

行狀

故誠意伯劉公行狀

黃伯生

祖庭槐字尚德追封永嘉郡公祖妣梁氏追封永嘉郡夫人
父煥字如晦追封永嘉郡公母宮氏追封永嘉郡夫人公諱
基字伯溫世為枯蒼人年十四入郡庠從師受春秋經人未
嘗見其執經讀誦而默識無遺習舉業為文有音氣決疑義
皆出人意表凡天文兵法諸書過目洞識其要講理性於復
初鄭先生聞濂洛心法即得其旨歸先生大器之乃謂公父
曰吾將以天道無報於善人此子必高公之門矣後應進士
舉授江西瑞州府高安縣丞揭文安公曼碩見公謂人曰此
魏徵之流而英特過之將來濟時器也公在燕京時閱書

肆有天文書一帙因閱之翊日即背誦如流其人乃大驚欲以書授公公曰已在吾胸中矣無事於書也之官以廉節著名發姦擿伏不避強禦為政嚴而有惠愛小民自以為得慈父而豪右數欲陷之時上下咸知其廉平卒莫能害也新昌州有人命獄府委公覆檢案覈得其故殺狀初檢官得罷職罪其家眾倚蒙古根脚欲害公以復讐江西行省大臣素知公遂辟為職官掾史以謹直聞後與幕官議事不合遂投劾去隱居力學至是而道益明後為江浙儒學副提舉為行省考試官頃之建言監察御史失職事為臺憲所沮遂移文決去嘗遊西湖有異雲起西北光映湖水中時魯道原宇文公諒諸同遊者皆以為慶雲將分韻賦詩公獨縱飲不顧乃失言曰此天子氣也應在金陵十年後有王者起其下我當輔

之時杭城猶全盛諸老大駭以為狂且曰欲累我族滅乎悉去之公獨呼門人沈與京置酒亭上放歌極醉而罷時無能知者惟西蜀趙天澤知公才器以為諸葛孔明之流嘗作文以期之方谷珎反海上省憲復舉公為浙東元帥府都事公即與元帥納隣哈刺謀築慶元等城賊不敢及帖里帖木耳左丞招諭方寇復辟公為行省都事議收公建儀招捕以為方氏首亂掠平民殺官吏是兄弟者宜其而斬之餘黨協從誑誤宜從招安議方氏兄弟聞之懼請重賂公公悉却不受執前議益堅帖里帖木耳左丞使其兄子省都鎮撫以公所議請于朝方氏乃悉其賄使人浮海至燕京省院臺俱納之惟招安授谷珎以官乃駁公所議以為傷朝廷好生之仁且擅作威福罷帖里帖木耳左丞輩羈管公于紹興公發

憤慟哭嘔血數升欲自殺家人葉性等力沮之門人密理沙
曰今是非混淆豈公自經於溝瀆之時耶且大夫人在堂將
何依乎遂抱持公得不死因有痰氣疾是後方氏遂橫莫能
制山越皆從亂如歸公在紹興放浪山水以詩文自娛時與
好事者游雲門諸山皆有記行省復以都事起公招安山寇
吳成七等使自募義兵賊拒命不服者輒擒誅之畧定其地
復以為行樞密院經歷與行院判石末宜孫守處州安集本
郡後授行省郎中經畧使李谷鳳巡撫江南諸道採守臣功
績奏于朝時執政者皆右方氏遂置公軍功不錄由儒學副
提舉格授公處州路總管府判諸將聞是命下率皆解體勅
書至公於中庭設香案拜曰臣不敢負世祖皇帝今朝廷以
此見授無所宣力矣乃棄官歸田里時義從者俱畏方氏殘

虐遂從公居青山山中公乃著郁離子客或說公曰今天下
擾擾以公才畧據括蒼併金華明越可折簡而定方氏將浮
海避公矣因畫江守之此勾踐之業也舍此不為欲悠悠安
之乎公笑曰吾平生忿方谷珎張仕誠輩所為今用子計與
彼何殊耶天命將有歸子姑待之會

上下金華定括蒼公乃大置酒指乾象調所親曰此天命也
豈人力能之耶客聞之遂亡去公決計趨金陵衆疑未決母
夫人富氏曰自古衰亂之世不輔真主詎能獲萬全計哉衆
乃定或請以兵從公曰天下之事在吾與所輔者爾奚以衆
為乃悉以衆付其弟陞俾家人葉性朱佑等叅掌之且曰善
守境土毋為方氏所得也勿憂我適總制官孫炎以
上命遣使來聘公遂由間道詣金陵陳時務策一十八款

上從之會陳氏入寇獻計者或謀以城降或以鍾山有王氣欲奔據之或欲決死一戰不勝而走未晚也公獨張目不言上召公入內公奮曰先斬主降議及奔鍾山者乃可破賊爾上曰先生計將安出公曰如臣之計莫若傾府庫開至誠以固士心且天道後舉者勝宜伏兵伺隙擊之取威制敵以成王業者在此時也

上遂用公策乘東風發伏擊之斬獲凡若干萬

上以克敵之賞賞公公悉辭不受中書省設御座將奉小明王以正月朔旦行慶賀禮公大怒罵曰彼牧豎爾奉之何為遂不拜適

上召公公遂陳天命所在

上大感悟乃定征伐之計遂攻皖城自昏達旦不拔公以為

遂拔江州

遂悉軍西上陳氏率其屬走湖廣江州平

使都督馮勝將兵攻某城命公授方畧公書紙授之使夜半出兵云至某所見某方青雲起即伏兵頃有黑雲起者是賊伏也慎勿妄動日中後黑雲漸薄回與青雲接者此賊歸也即銜枚躡其後擊之可盡擒也衆初莫肯信至夜半詣所指地果有雲起如公言衆以為神莫敢違竟拔城擒賊而還王漢一以饒信降

上命公撫之陳氏洪都守將胡均美使其子約降請禁止若于事上初有難色公自後陽所坐胡床

上意悟許之均美遂以城降初公聞母富氏喪悲慟欲即歸上以書慰留之期以成功公不得已遂從征伐至是辭歸

上遣禮官律伴累伊帛祭 恩禮甚厚時苗軍反金華栢蒼
殺守將胡大海耿其孫炎等衢州或謀翻城應之守將夏毅
懼無所措會公至即迎入城一夕定之公即發書金處屬縣
諭以固守所部遂同邵平章諸軍克復處城擒苗帥智其李
某處州平公至家營葬事時語所親以 上必當有天下之
狀於是鄉里及隣附郡縣翕然心服方氏雖據温台明三郡
其士大夫皆仰公如景星慶雲其小民亦未嘗不懷公之舊
德也方氏素畏公名時遣人致書奉禮公不敢受使人白于
上上因令公與通問公因宣 國家威德方氏遂納土入貢
上時使人以書訪軍國事公即條答悉合機宜某年月日公
赴京道經建德今嚴州也適張氏入寇時曹國公守建德欲
奮擊之公乃使勿擊曰不出三日賊當自走追而擊之此成

擒也比三日黎明公登城望之曰賊走矣衆見其壁壘旗幟
皆如故且聞嚴鼓聲疑莫敢輕動公趣使疾進兵至則皆空
壘擊鼓者乃所掠老弱耳遂窮追賊迸走至東陽悉擒之以
還公遂至京時陳友諒據湖廣張仕誠據浙西皆未下衆以
為蘇湖地肥饒欲先取之公曰張仕誠自守虜耳陳友諒居
上流且名號不正宜先伐之陳氏既滅取張氏如囊中物耳
會陳氏復攻洪都

上遂伐陳氏因大戰于彭蠡湖勝負未決公密言於

上移軍湖口期以金木相犯日決勝 上皆從之陳氏遂平

上還京定計取張仕誠因定中原拓土西北公密謀居多

上或時至公所屏人語移時乃去雖至親密莫知其由以公

為太史令一日公見日中有黑子奏曰東南當失一大將時

參軍胡深伐福建果敗沒他日公見

上上方欲刑人公曰何為上語公以所夢公曰是衆字頭

上有血以土傅之得土得衆之象應在得夢時三日當有報

至上遂留所欲刑之人以待之三日後海寧以城降果如

公言捷至上大喜悉以所留人俾公縱之其年月日熒惑

守心群臣皆震懼公密奏上宜罪已以回天意次日

上臨朝卽以公語諭群臣衆心始安後大旱

上命公諗滯獄凡平反出若干人天應時雨

上大喜公因奏請宜立法定制上從之張仕誠平後張杲

欲亂政乃使人上書稱頌功德勸上宜及時為娛樂

上以示公公曰是欲為趙高也上頷之杲色動知公得其

情也乃使齊翼嚴等同察公陰事欲陷之未及發而杲先事

受誅及司天臺災異嚴因為書言之於上其事多公平日

密聞於上或上使為之者翼嚴未之知也書奏

上切責翼嚴斬之遂治黨與盡得其與杲通謀狀

上適以事責丞相李善長憲使凌悅因彈之公為

上言李公舊勲且能輯和諸將上曰是數欲害汝汝乃為

之地耶汝之忠勲足以任此公叩頭曰是如易往必須得大

木然後可若束小木為之將速顛覆以天下之廣宜求大才

勝彼者如臣駑鈍尤不可爾上怒遂解洪武元年正月

上登大寶于南郊公密奏立軍衛法外人無知者拜御史臺

中丞適中丞章公溢奏定處州七縣稅糧比宋制畝悉加五

合上特命青田縣糧止作五合起科餘准所擬且曰使劉

伯溫鄉里子孫世世為美談也或言有殺運三十年公慨然

曰使我任其青著掃除弊俗一二年後寬政可復也

上幸鳳陽使公居守公志在澄清天下乃言於上曰宋元

以來寬縱日久當使紀綱振肅而後憲政可施也乃命憲司

糾察諸道彈劾無所避公案劾中書省都事李彬侮法等事

罪當死丞相李善長素愛彬乃請緩其事公不聽遣官賫奏

詣行在上從公議處彬死刑公承旨即斬之由是與李

公大忤比上回京李公愬之公乃求退上命歸鄉里公

奏曰鳳陽雖帝鄉然非置都之地王保保雖可取然未易輕

也願聖明留意焉遂辭歸後定西失利王保保竟走沙漠

上手詔叙公勲伐且召公赴京師同盟勲冊公至京師

上賚賜甚厚追贈公祖父爵皆亦嘉郡公累欲進公爵公曰

陛下乃天授臣何敢貪天之功聖恩深厚榮顯先人是美

遂固辭不敢當上知其至誠不强也上欲相楊憲公與

憲素厚以為不可上恠之公曰憲有相才無相器夫宰相

者持心如水以義理為權衡而已無與焉者也今憲不然能

無敗乎上曰汪廣洋何如公曰此褊淺觀其人可知曰胡

惟庸何如公曰此小犢將借轅而破犁矣上曰吾之相無

逾於先生公曰臣非不自知但臣疾惡太深又耐繁劇為

之且孤大恩天下何患無才願明主悉心求之如目前

諸人臣誠未見其可也三年七月授弘文館學士十一月進

封誠意伯四年正月賜歸老鄉里二月至家遣長子璉捧表

詣闕謝恩某年某月復遣璉進賀平西蜀表頌上仍以文答之八月上使

尅期以手書問天象事公悉條答其大意以為霜雪之後必有陽春今國威已立自宜少濟

以寬書奏上悉以付史館其書藁并已前奏請諸藁公皆焚之莫能得其詳也初公言於上甌括間有隙地曰談洋及抵福建界曰三魁元末頑民負販私鹽因挾方寇以致亂累年民受其害遺俗猶未革宜設巡檢司守之上從之及設司頑民以其地係私產且屬温州界抗拒不服適茗洋遊軍周廣三反溫處舊吏持府縣事匿不以聞公令長子璉赴京奏其事逕詣上前而不先白中書省時胡惟庸爲左丞掌省事因挾舊忿欲搆陷公乃使刑部尚書吳雲詠老吏訐公乃謀以公欲求談洋爲墓地民弗與則建立司之策以逐其家庶幾可動上聽遂爲成案以奏願上知公置不問省部又欲逮公長子獄上時已勅璉歸及奏上曰旣歸矣免之公入朝惟引咎自責而已先是勸憲敗後

汪廣洋爲丞相未幾而貶廣東乃相惟庸公乃大感嘗謂人曰使吾言不驗蒼生之福也言而驗者其如蒼生何遂憂憤而舊疾愈增洪武八年正月胡丞相以醫來視疾飲其藥二服有物積腹中如卷石公遂白于上上亦未之省也自是疾遂篤三月上以公久不出遣使問之知其不能起也特御製爲文一通遣使馳驛送公還鄉里居家一月而薨公生於至大辛亥六月十五日薨於洪武乙卯四月十六日享年六十五歲公之子璉仲璟以是年六月某日葬公於其鄉夏山之原禮也遺文郁離子十卷覆瓿集二十四卷寫情集四卷長子璉又集所遺文藁五卷名曰犁眉公集娶富氏封永嘉郡夫人繼室陳氏章氏子男二人長璉由考功監丞任江西叅政卒于官次仲璟皆陳氏出也女二人長適吳彪次適

沈安皆章氏出也孫男三人薦虎豹孫女三人幼未適也公未薨前數日乃以天文書授璉使伺服闋進且戒之曰勿令後人習也復命次子仲璟曰胡惟庸必敗我欲奉遺表無益也日後上必思我待有問當密爲我奏其畧以爲修德省刑祈天來命且爲政寬猛如循環耳諸形勝要害之地宜與京師聲勢連絡幸聖主留意公生平剛毅慷慨有大節每論天下安危則義形於色然與人交游開心見誠坦蕩無間阻至於義所不直無少假借雖親之者以此而忌之者亦以此惟上察其至誠任以心膺公亦以爲不世之遇知無不言每遇急難勇氣奮發計畫立就外人莫能測其機累贊上成大功上嘗臨朝稱之公輒逡巡不敢當家居惟飲酒奕棋未嘗自言其功每天象有大變則累日不樂凡公以天

下蒼生休戚爲憂喜者卽此可知矣上天威嚴重惟公執言直議不以利害休其中上亦甚禮公常稱爲老先生而不名又曰吾子房也廷臣或有過失得譴者公密爲救解而免其人或知而詣公謝者則拒不納其人不知亦未嘗爲人言也其居鄉里守禮義尚節儉多陰德不以富貴驕人公初與同郡葉公景淵胡公仲淵章公三益金華宋公景濂同出處有通家之好至於居官任政則各行其志俱以功名顯於世而公與宋公又以文章爲當代首稱云伯生辱在同郡預諸生列與公子璉仲璟相知最深今公薨而璉沒仲璟與璉之子薦請錄公遺事因輯平昔所聞大畧爲行狀至於皇上知人之明倚注之重公之遭遇感激以天下公議輔人主者觀綸綍之文考成就之蹟可見矣其籌策帷幄有不能

盡詳者亦不敢強質也

故叅軍縉雲郡伯胡公行述

王禕

公諱深字仲淵姓胡氏系出漢安定宋初有諱棟者自潤之
丹陽遷處之龍泉因家焉棟生璠璠生文虎文虎生竦竦生
晟晟生滂滂生衢州錄事叅軍松年松年生鄉貢進士應辰
應辰生温州樂清縣令琇琇生江南西路兵馬都監見大則
公之曾祖也祖諱堂妣季氏考諱鉅仕元為征東行中書省
左右司員外郎妣趙氏公生有奇質讀書過目即成誦員外
府君蚤歲宦游京師公甫十歲而季夫人與趙夫人相繼沒
公侍大父撫幼弟艱難刻厲以自植立而學業益以進下筆
為文數百言可立就弱冠游京師適員外府君仕高麗乃往
候焉居久之員外府君捐館舍而繼母實生弟海年尚幼公

泣謂海曰天禍我家我父棄諸孤萬里外今吾奉匱南還爾
其留此以事母他日吾當復迎吾母與爾矣舟行一日泊大
崖下夜夢父老語之曰此崖且崩宜急避驚覺趣移舟俄頃
大風雨至崖果崩墮水聲如萬雷霆人謂此其孝感所致云
既歸葬遂廬于墓左悉取諸子百氏天官地志兵謀醫藥術
數卜筮佛老之書而研究之然於醫尤精常曰窮而在下者
不能及物唯醫可能濟人耳乃建藥肆市中有以疾病來告
者輒與之藥弗與計直也至正壬辰江淮倣擾盜賊蔓延闕
浙間由建之浦城松溪入龍泉公歎曰浙水東地氣白矣生
民無所賴禍將及矣乃集鄉民共為守禦計而結寨於湖山
於是處州境內民相挺為盜江浙行省調萬戶石抹公宜孫
成處州辟公叅謀其軍事一見懽如平生石抹公喜曰吾事

濟矣胡公籌策今無與比區區小醜不足平也即檄屬縣募壯士為軍十日間得數千軍于竹口傳檄賊中曰爾等皆良民因誑誤故為亂弃仗即仍為良民耳賊中傳相謂曰胡君長者其不欺我盍歸之盡燬器械相率肉袒來請罪公一綏之以恩餘寇次第而平歲甲午二月石抹公還臨海公亦歸隱於湖山三月温州戍卒韓虎陳安國殺主帥據城叛行省命宣慰使恩寧普討之道由處州辟公計事公與語意合軍事請公參謀之公曰除暴所以救民今溫城叛者上一二人若破其城玉石不分如平民何此宜以計取不可以力攻也乃遣辨士入城說其黨曰韓虎陳安國悖逆亂常今王師致討大兵四集旦夕即攻城雖金湯無不破者若等胡為為賊守自取作壘粉耶今將軍念若等未忍即加兵若等能去逆

效順悉從原宥苟稔惡不悛城一破悔無及已其黨聞語已感相向泣曰吾屬自度皆日暮鬼耳今乃蒙將軍開生路敢不惟命六月果殺韓虎等以城降溫城瀕海民以漁為業是時城閉者三月民病甚公即請發粟賑之事有不便者皆為之更除驩聲載道曰吾民早得見胡君豈至顛沛如是耶恩寧普公欲列公功以聞于朝公謝曰幸遇明公為知己得效寸尺志願足矣何以功為既而恩寧普公以行省參政總兵番陽復辟公與俱行軍務無巨細悉諉之信任之者益至歲丙申六月青田潘惟賢葉仲賢聚眾為亂聲言攻龍泉縣長吏聞風遁賊遂焚縣治公之師曰王先生毅與門弟子集義兵擊退之縣長吏及里中惡少年疾其功因害王先生公時在番易聞之馳而歸語同門友曰昔毛術能為師復仇吾徒

頤不能耶乃引兵執害王先生者盡殲之遂從事於青田而麗水之浮雲泉溪賊並起歲丁酉春縉雲之黃村松陽之白巖遂昌之大社無籍之民盡為賊勢連結不可遏行省丞相康里公承制以石抹公為行樞密院判官分院鎮處州既至即假公本院行軍都事統兵以討亂九月攻泉溪賊寨拔之十一月又平浮雲歲戊戌正月白巖賊來降五月縉雲賊亦平八月移師攻遂昌賊酋周天覺方友元傾其巢穴出迎敵公望見咲曰此非天授我乎使賊堅守窟穴未易即殄滅今日之來送死必矣乃分部諸校以正兵與接戰以奇兵左右翼夾擊之別遣游軍入山搜其伏匿比戰賊三面受擊大敗斬首數千級生擒八百人獲方友元梟之乘勢直擣大社周天覺降乃班師歲己亥秋以兵討青田賊黨金德安誅潘惟

賢兄弟以降於是處之境內諸賊悉平矣先是國兵取浙東

衢婺既下獨處州為石抹公所守不肯降是歲冬

今上皇帝遣僉樞密院事胡公大海由間道取處州石抹公出戰敗北大軍遂入城而分兵取屬縣未附者公時以假元帥統龍泉慶元松陽遂昌四縣兵欲閉關為拒守計四縣士民咸請于公願內附以全民命且曰公治兵十年勤勞亦至矣而朝廷未聞有一命之錫國家則負公公何負於國哉公知時事已去不得已挺身見胡公而四縣因得不受兵

上素聞公名驛召至南京待以殊禮居無何擢中書省左司員外郎 上月與公議論天下事公有言 上未嘗不稱善

也歲庚子秋命公相龍灣虎口形勢築一城以衛京師工不煩而事以集歲辛丑秋有旨命公還處州招集舊所部將校

士卒以從征西歲壬寅春從上平江西命公以親軍指揮
領兵守吉安會淞東苗軍叛發守將既被害而處城亦為其
所據上命公以所部兵馳還復處城比至城已復即除公
淞東行中書省左右司郎中總制處州軍民事時山寇乘苗
之亂往往竊發公隨方招捕凡首惡者盡誅之於是守兵猶
單寡公募之得勝卒萬餘人軍需糧餉雖取給於民而民素
受其惠咸樂輸之無敢後時江西俱食淞東益而有司十分
抽其二商賈絕少公請二十分取一從之敗者乃通軍用以
給歲癸卯春諸暨守將謝再興以城叛兵犯東陽平章奉公
擊却之公引兵為之援因建議以謂諸暨淞東潘障諸暨不
守則衢婺不支矣乃度地距諸暨五十里五指巖下別築一
城不旬日而成樓櫓橐橐不畢備上聞諸暨叛遣使議

別為城守計使者至城已完上嘆賞不已已而浙西將李
伯貞大舉入寇兵號六十萬頓城下城堅不可攻迺引去
上念公立城之功遣名馬賜之青田之蘆茨地接閩境人素
獷悍恃其地險惡屢叛屢服至是乘我師在外復為寇公還
引兵直抵其地二十年逋誅之徒悉就殄滅人咸快之歲甲
辰秋温州方明善取平陽時平陽已為我所有公出偏師復
之併復瑞安所侵地而親領大軍攻温州明善窘蹙乃與其
叔國珍議納歲貢銀三萬兩有旨俾班師公迺入覲
上欲遂柄用之公以邊境未寧願還守外以自効時
上既即王位迺除公王府叅軍仍總制處州等翼陛辭
上諭之曰侯閩浙俱平當還汝中書美歲乙巳春福建陳有
定來寇邊公率師往征之遂取建之浦城繼而建之崇安建

陽二縣亦俱下 上遣使賜以所御名馬將士賞勞有差建
之守將阮德柔以兵四萬屯錦江實出我師後公還兵擊之
破其二柵有定大恐盡率精銳來圍我營公突陣與決戰馬
蹶因被執有定既得公甚相禮待公因具道 主上神聖四
海歸心群雄樂為之用且援竇融歸漢故事以撼之有定初
無害公意會元使至督迫之公遂遇害于福州得年五十有
二訃聞 上痛悼不已遣使卽其家祭之命中書議加卹典
追封縉雲郡伯有爵而無階官職勳者有司之制未備也公
天資穎拔智識絕人其於藝術弗學則已學之無弗精詣者
性倜儻好施予賢士大夫有貧乏者傾橐以餽之弗吝也其
守鄉郡凡五載馭民一以寬厚用兵十餘年未嘗慘一卒恩
惠及人甚多故其沒也聞者無不流涕鄉人為立祠以祀之

公先配項氏先五年卒生二子長曰楨今為宣武將軍僉處
州衛指揮司事次曰杞女一人適同里章存厚繼室楊氏故
中書左司郎中元杲之妹也公既沒之二年楨等乃刻木為
像具衣冠以塋實附于園原先塋之次會國兵既取閩俘有
定至京 上命楨齧其肉以祭公禱辱與公交二十年知其
為人學瞻而才裕慨然有志於功名者也遭時叔季未及有
所樹立及既結知 真主庶幾有以自見於事功矣而昊天
不弔不及竟其才之用以究其志之所欲為豈非其命也夫
公當定謚於奉常立傳於 國史而勒銘於神道然行狀久
未克為於是楨來以為請誼不得辭謹為攬撫其平生大凡
而具書之雖於公之穎識淵度無能有所發揮庶幾無愧辭
者矣

翰林學士承旨宋公行狀

鄭楷

先生諱濂字景濂世為婺之金華人也其先有諱憲者官大理丞為易講師弟子衆至數千人唐武德間自京兆尹遷吳興更十四世有諱榮者私謚文通先生通尚書春秋周廣順中徙于義烏隱居覆釜山又七世至宋嘉定初有諱栢者復遷金華其地曰潛溪又五世乃至先生始遷浦江仁義里之青蘿山仍以潛溪扁其所居示不忘本也於是四方學子咸以潛溪先生稱之先生在妊七月即生為嬰兒時苦多病每風眩輒昏迷數日祖母金及母陳更相保抱得免無虞年六歲入小學授以李瀚蒙求一日而盡自後日記二千言同肄業者日暮罷歸其所讀書先生皆成誦九歲為詩歌有奇語人異之呼為神童年十五六里人張繼之長者也聞先生善

記誦邀至別墅所問以四書經傳若干日可通倍先生以一月為答初繼之不之信抽架上雜書俾即記五百言先生以指爪逐行按之按畢輒倍一字不遺繼之告先生之父尚書公曰是子天分非凡當令從名師即有成爾乃携入城府受業于聞人夢吉先生授以春秋三傳之學凡學春秋者皆苦其歲月先後雜記先生即并列國紀年能悉誦之但舉經中一事即知為魯公幾年幾月是年實當列國某君幾年幾月或俾書而覆之無少異者且兼通易書詩及周禮諸經先生為舉子業每出諸生右會吳貞文公萊授經於白麟溪上攻古文辭金華胡君翰亦來從學胡君致書于先生曰舉子業不足回景濂盍來同學古文辭乎先生欣然來從吳公博極經史學之未幾悉得其闡奧自是先生文章之名籍然著聞

矣居無幾何吳公解館而歸先生嗣主教席子弟年十六者皆相從讀書講道東明山中受業者一門凡四十餘人始終越二十年學成多有躋膺仕者當是時曾伯祖貞和府君主家政年踰八十端嚴方正先生年甫四十又五終日毅然賓主人尤高之府君方著家規示子孫其冠婚喪祭儀制禮文多參問於先生先生則據證古今準酌時宜以成一家之法子孫世守詩禮之教者先生之力也先生嗜學日篤時柳文肅公貫黃文獻公潛皆大儒天下所師仰又各及其門執子弟禮二公則皆禮之如朋友柳公曰吾邦文獻浙水東號為極盛吾老矣不足肩荷此事後來繼者所望惟景濂以絕倫之識而濟以精博之學進之不止如駕風帆於大江中其孰能禦之黃公曰吾鄉得景濂斯文不乏人矣先生所為文多

經二公指授柳公謂其渾雄可喜黃公謂其雄麗而溫雅國子監丞陳君旅序先生之文謂能兼二公之所長歐陽文公玄謂非才具衆長識邁千古安能與於斯先生為當時所稱許如此二公相繼卽世先生踵武而起遂以文章名海內矣至正己丑用大臣薦擢先生將仕佐郎翰林國史院編脩官自布衣入史館為太史氏儒者之特選先生以親老不敢遠違固辭會世亂益鞫闕不事表顯乃與弟子入龍門山著書二十四篇曰龍門凝道記及著孝經新說周禮集註等書弟子乃先公貞孝處士諱淵府君也初宋南渡後新安朱文公東萊呂成公並時而作皆以斯道為己任婺實呂氏倡道之邦而其學不大傳朱氏一再傳為何基氏王栢氏又傳之金履祥氏許謙氏皆發人而其傳遂為朱學之世適先生既

間因許氏門人而究其說獨念呂氏之傳且墜奮然思繼其
絕學每與人言而深慨之識者又以知其志之所存蓋本於
聖賢之學其自任者益重矣先生於天下之書無不讀而析
理精微百氏之說悉得其旨要至於佛老之學亦所研究用
其義趣裁為經論類其語言實諸其書中無辯也誠意伯劉
君基謂其主聖經而奴百氏馳騁之餘取佛老語以資戲劇
譬猶飲梁肉而茹茶飲茗汁耳歲庚子

大明皇帝定鼎金陵遣使者樊觀奉書幣造門徵先生先生
曰昔聞大亂極而真人生今誠其時矣遂幡然應

詔先生與青田劉君基麗水葉君琛龍泉章君溢俱見
上尊重之語必稱先生而不名七月以先生為江南等處儒

學提舉十月奉 旨入內授 皇太子經先生誠明儼恪遇

綱常大義明白開陳再三言之而不倦 上深嘉歎之壬寅

八月 上召先生及興國孔克仁講春秋左氏傳畢先生起

曰春秋乃孔子褒善貶惡之書苟能遵行則賞罰適中天下

可定也是月告歸省親有白金文綺之賜且曰卿之誠懇朕

素知之故有此賜耳甲辰十月改起居注先生侍

上左右知無不言補益甚衆明年正月 上御端門與先生

論及黃石公三畧且口釋之先生進曰尚書二典三謨帝王

大經大法靡不畢具願 陛下留意講明之 上曰朕非不

知典謨為治之道但三畧乃用兵攻取時務所先耳嘗侍

上語嘗資先生曰天下以人心為本苟得人心帑藏雖竭無

傷也人心不固 上金帛何補於國耶 上詔丞相李公善

長歸江西軍中 牛於其民無牛者官給之勿取其租丞

相退 上顧先生曰向所言事當乎先生對曰民富則君不至獨貧民貧則君何能獨富捐利於民實興邦之要道也三月先生以疾告 詔還家燮治仍賜金帛 皇太子致贈有加焉六月先生上箋謝 恩復奉書 皇太子勉以孝友恭敬勤敏讀書無怠惰毋驕縱脩進德業以副天下之望

上覽書喜甚召 太子語以書意且 賜書答其畧曰曩者先生教吾子以嚴相訓是為不佞也以聖人文法變俗言教之是為疏通也所守者忠貞所用者節儉是為得體也昔聞古人今則親見之復以文綺侑書 上每與群臣言先生淳謹君子輔導有方眷遇甚隆既而先生丁尚書公憂及服除

洪武二年 詔徵先生總脩元史六月除翰林學士亞中大夫知 制誥兼脩 國史時編摩之士皆山林布衣發凡舉

例一仰於先生先生通練故事筆其綱領及紀傳之大者圖列歛手承命而已逾年書成先生之功居多時剖符封功臣下先生議五等封爵召宿大本堂討論達旦先生歷據漢唐以來故實量其中而奏之曰此可法彼不可法皆傳於理而已時甘露屢降 上問災祥之故先生對曰受命不于天于其人休符不于祥于其仁是以春秋不書祥而紀異為是故也 上姪文正以荒淫擅殺得罪先生言曰文正罪固當死陛下體親親之義生之而置諸遠地則善矣 上嘗言古之帝王當宴安之餘多好神僊以朕言之使國治民安心神恬康即神僊也先生對曰漢武好神僊而方士至梁武好佛而異僧集皆由人主篤好故能致之使移此心以求賢輔天下其有不治乎 上深然之 上既追封外王父為楊王立廟

京師御通天冠絳紗袍以祭祭畢召大臣問曰朕祭外王父
卿等以為不當服袞冕何也先生對曰袞冕惟祭天地宗廟
用之餘則當降禮也 上嘗祀方丘患心不寧先生進曰孟
軻有言養心莫善於寡欲審能行之心清而身泰矣

上稱善久之三年十二月遷奉議大夫 國子司業 國子
多大臣子弟先生蒞之以莊率之以正日進諸生立兩序據
坐執經敷揚闡奧之旨教以孝悌忠信之道學者帖帖遵度
惟恐不得為先生弟子 上欲試先生以吏事四年八月授
安遠知縣五年二月召為禮部主事十二月擢 太子贊善
大夫階如司業時先生之忠誠久而彌篤 皇太子一言一
動皆以禮法諷諭使歸于道讀書至切於政教及前世興亡
之故必拱手揚言曰君國子民之道當如是 不當如彼且推

人情物理以明其義 皇太子每歛容嘉納敬禮未嘗少衰
言則曰師父師父云且書崔學二字以賜先是 上問帝王
之學何書最要先生請 上讀真德秀大學衍義

上覽而悅之令左右大書揭之兩廡之壁時睇觀之六年二
月 上御西廡大臣皆侍坐 上指衍義中言司馬遷論黃
老事令先生講析俾在坐者聽之先生既如 詔復言曰漢
武嗜神仙之學好四夷之功民力既竭重刑罰以震服之臣
以為人主能以義理養性則邪說不能侵興學校教民則禍
亂無從而作矣刑罰非所先也 上謂先生曰朕之為君上
畏天下畏兆民兢兢業業不敢自逸先生對曰 陛下此
心古先哲王之心也書曰予臨兆民凜乎若朽索之御六馬
為人上者柰何不敬正謂此爾願 陛下慎終如始天下幸

甚 上御齋室先生侍坐 上問三代歷數封疆之脩短廣
狹先生歷言之且曰三代之治天下也以仁義故歷年之多
後世莫及 上從容謂曰 皇太子留心治道卿等宜常與
論議庶廣識見幸善調護之 先生益孜孜弗懈七月陞翰林
侍講學士中順大夫知 制誥同脩 國史仍兼贊善大夫
先生之父文昭贈中順大夫 禮部侍郎母陳氏贈德人先生
奉 詔搜萃歷代姦臣之蹟 編為辨姦錄及進 太子諸王
各分賜焉初 上作祖訓錄 至是成 命先生作序諭以大
意先生歷言帝王之道及 皇上創業之艱以致箴戒之意
於後人 上稱善命刻于篇 先生嘗侍 上至後苑觀穫
上曰農事成矣先生對曰國 以民為本民以食為天
陛下知稼穡之艱難而念民 生之良苦實盛德也 上問曰

三代以上所讀何書先生對曰上古載籍未立不專讀誦而
尚躬行人君兼治教之責躬行以率之天下有不從教化者
乎八月奉 旨纂脩大明日曆一百卷擇言行之大者為寶
訓五卷先生總裁其事朝夕禁中至七年五月乃成先生自
以布衣沐非常之遇誓竭誠以報 國凡 上有所任使靡
晷靡夜躬閱載冊書于牘進之或覆視于冊一字不遺先生
在朝日久若郊社宗廟山川百神之典朝享宴慶禮樂律曆
衣冠之制四夷朝貢賞賚之儀及勲臣名卿焯德耀功之文
承 上旨意論次紀述咸可傳於後世先生在 上前所陳
說不為文飾隱蔽雖家事苟有問亦一一道之常曰君猶父
也天也其可欺耶 上嘗問昨日飲酒否座客為誰僕為何
物悉以其人及膳羞品對 上笑曰卿飲時朕令人視之果

如卿言卿信不欺我故上又而益信其誠欲俾參大政先生辭曰臣少無他長惟文墨是攻今幸待禁林

陛下之恩大矣臣誠不願居職任也上愈厚之每宴見必

命茶賜坐每旦令侍膳詢訪舊章講求治道或至夜分乃退

先生屢有所建明召問廷臣臧否第言其善者不置又問否

者為誰先生曰善者臣友故知之否者縱有臣不知也卒

無所毀短或命賦詩為文必寓忠告嘗奉制詠鷹令七舉

足即成有自古戒禽荒之言上忻然曰卿可為善諫矣然

先生絕不以語人至於應制之作亦不留藁嘗溫樹二字

於居室之壁有問及內事者指以示之上嘗與先生飲先

生素不勝杯勺舉觴即辭上強之至三觴面如赭行不成

步上歡笑親御翰墨賦楚辭一章以賜仍命侍臣咸賦醉

學士歌且曰俾後世知朕君臣梁若此也甘露降

上召先生賜坐上躬執金杓煉於鼎以甘露投之手注

于卮以賜先生曰此和氣所凝能命天延年故與卿共之耳

皆異恩也九年六月上以先生典制作宣勞為多特拜

翰林學士承旨嘉議大夫知制誥兼脩國史

上每謂先生曰朕以布衣為天子卿亦起草萊列侍從為開

國文臣之首俾世世與國同休不亦美乎趣令取子孫官之

先生屢辭謝不敢奉詔至是年某月詔徵先生冢子瓚

之子慎為殿廷儀禮司序班未幾復召介子璉除中書舍人

上時休暇輒命題試璉與慎而戒飭之上笑語先生曰朕

為卿教子孫先生或奏事久稱倦上命璉慎共扶下殿祖

子孫三世皆官內廷當世以為異事復以先生艱於行步特

詔 皇太子選良馬以賜 上親作馬歌復 詔群臣咸作
之以寵耀焉先生益感激不自寧常戒子孫曰 上德猶天
地也將何以爲報獨有誠敬忠勤畧可自效萬一耳
上以先生年且至不可煩以事十一月有致政之 詔乃加
贈先生之父侍郎爲嘉議大夫禮部尚書母德人爲淑人祖
德政贈亞中大夫太常少卿祖妣金氏贈淑人夫人賈氏封
亦如之先生及二代 誥辭皆 上所親製天下榮之
誥辭中稱先生德量之弘如千頃波澄之不清撓之不濁人
以爲 上知人之明云先生行既有期 上眷念尤深曰卿
去何時復來見朕乎宰相侍數日姑徐徐行由是朝夕左右
者累月時 詔許言事朝臣有上疏萬言者 上聽厭其
迂衍怒欲罪之以問群臣有阿意者指其疏曰此不敬此詆

謗罪當誅

上答之而罷怒未解召先生先生曰彼應

詔上疏其心爲國耳烏可深罪乎

上默然已而 上覽疏

中有足采者召阿意者罵曰吾

怒時若等不能諫乃激吾

誅之何異以膏沃火向非宋景濂之言幾不誤罪言者耶

上嘗廷譽先生曰古之人太上爲聖其次爲賢其次爲君子

若宋景濂者事朕十有九年而未嘗有一言之僞誦一人之

短寵辱不驚始終無異其誠所謂君子人乎匪止君子抑可

謂之賢者矣在廷之臣皆以爲信然十年二月先生遂辭歸

瀕行賜紙幣文綺及

御製文集

皇太子贈以衣三襲

上諭曰朕最慎于賞予嘉卿忠誠可貫金石故以是賜卿卿

今年幾何矣先生曰六十有八

上曰歲此綺俟三十二年

後作百歲衣也先生叩首謝

上復屬曰大江漲不可舟卿

宜循內河達家庶幾無虞仍俾慎護先生行先生至家卽拜
表遣慎詣闕稱謝仍上箋皇太子申明正心治國之要
上賜詔褒答大旨謂先生忠良之臣勲業既著文章必傳
功成身退惟先生獨全初先生將辭請歲一來朝是年九月
朔先生遂入朝越十又四日見於端門上佇想已久延問
累矣及見大喜加勞再三皇太子諸王皆驩動顏色越翌
日上降勅符遣儀曹奉醪膳諸物抵寓館以賜自是日侍
上遊歷觀闕盤旋禁禦詢諮備至便殿侍食日晏始退恩禮
之優群臣莫敢望上嘗喟然嘆曰純臣哉爾濂純臣哉爾
濂方今四夷皆知卿名卿其自愛先生避謝不敢當凡所陳
論皆古之格言朝廷百官惟恐不留先生下至寺人衛卒見
先生至皆以手加額相推排迎拜恐不得先覩先生留

朝七旬餘上重先生還而難言之先生以歲暮力辭還復
遣中貴人賜上尊至於道所經行皆上爲先生指畫聖心
惓惓愈加於昔及先生旣行數日上問璩曰爾父道中無
恙否璩以安對未幾復謂璩曰朕疇昔之夜夢見爾父笑談
如曩時爾父雖去其容儀儼然在朕目中也璩叩頭謝曰
陛下垂念臣父之至何以形諸夢寐中書舍人史靖可太子
正字桂彥良等皆爲詩歌以紀之上之眷重先生不忘如
此先生德尊而不居位顯而彌恭旣司制作之柄造門求文
之士先後相繼寧夷朝貢者數問先生安否日本得潛溪集
刻板國中高句麗安南使者至購先生文集不啻拱壁而先
生躬然自持似不能言者遇人拜雖三尺童子必誦膝而首
下焉至於公侯貴人則未嘗降下曾不識其門何向朝廷有

大議閭閻引古今辯說不少有所回性命之理晚而益究其
極外物之往來視之若不相干嘗曰古人之爲學使心正身
脩措之行事俯仰無愧而已繁辭複說道之蔽也先生作事
不尚表襮務合乎義教人皆隨其質而導之使入於善尤篤
於倫品處父子兄弟夫婦之間者皆可爲法與人交和易任
真無鈞距縱爲所給亦弗與較臨財廉非其分不取大書於
門曰寧可忍餓而死不可苟利而生君子以爲名言權要及
有力者苟非其人雖置金滿囊求一字不肯與縱不得已與
之亦不受其餽謝日本使奉物請文以百金爲獻先生卻不
受上以問先生先生對曰大朝併從之官而受小夷金非
所以崇國體也上深然之貧賤人情有所哀欲發潛振
幽卽欣然爲之先生四持文以試天下士得公爲多接引後

學惟恐弗及遠方來者授館而飲食之雖久不衰有小善必
衆譽之色溫氣和近其側者如大寒之加重裘盛暑之濯清
風也天下之能文者多經先生指授朝廷英後咸以先生爲
法初奉勅教文華生數十輩至是出參大政爲御史知列
郡者相望四方士得一見先生夸於人以爲幸衆一言之賜
者人輒改觀視之不敢與齒士大夫言當世有德者必曰先
生而天下之人識與不識無賢愚咸推爲先生大人長者及
先生之歸上面發後學無師之嘆蓋先生之道內誠外恕
一出於正發之也當而行之也安哉上下信服若是云雖已
貴顯平居布衣蔬食無異貧士先生細目美髯狀貌豐厚不
爲奇異行以求過於人不事生產不置田宅或勤爲子孫計
先生曰富貴豈一家物哉吾乃所以遺之也先生惟刻意於

學自少至老未嘗一時去書不觀及致政歸青蘿山闢一室
曰靜軒終日閉戶纂述人不見其面戒子孫毋至城市姻婭
有以郡縣事為託者皆峻謝之或談及時事輒引去不與語
切於仁愛閭民有困乏者為之不飽先生視近甚明夜燃燈
於几卧絺帷中閱蠅頭小書一黍上能作十餘字皆可辨點
畫人以為先生不飲酒寡嗜欲所致豈或然歟先生所著文
有潛溪集四十卷蘿山集五卷龍門子三卷浦陽人物記二
卷已傳於學者翰苑集四十卷芝園集歸田已後所著計四
十卷十三年冬先生孫慎以罪被刑舉家當真重辟

上念先生特降赦安置茂州十四年五月二十日先生以疾
卒於夔府臨歿端坐歛手而逝當是時夔之府守官吏皆來
賻贈哭與葬先生於夔府之西連華池山下其纏絕喪壙刻

石表墓者則知事桑以從也先生生於至大庚戌十月十二
日享年七十有二娶賈氏名專字主敬賢而有德為女婦師
前先生一年卒葬青蘿山子男二長璿次璿有文行精篆隸
直草四體書女二長適金華賈林次適義門鄭林孫男慎愷
恂懌愷嗚呼楷自垂髫時嘗侍先公自孝府君拜先生於床
下先生不以童子無知即辱進而教之親承化育于茲有年
矣弟懼才質凡庸學如望洋有孤父誨之教今聞先生謝世
長慟莫知所從竊念先生道德文章固已顯著於當世而出
處遭逢行事之盛世系遷徙生卒歲月之詳尚恐人未盡知
爰敢哀取翰林待制王公禕先伯公太常博士諱濤君舊著
小傳及同門友某所作歷官記輯為行狀一通俟請當代
立言君子著為碑銘表諸墓隧庶幾他日太常國史有所

採擇焉

故翰林待制華川先生王公行狀

鄭濟

公諱禧字子充姓王氏其先太原郡人五代時節度使彥超自會稽徙居金華之義烏遂爲義烏人其後有自固者游安定胡先生門登宋皇祐五年進士第卒官恩陽令南渡後有典方州積階至金紫食邑開國封男者至公之夫父斐澤往元爲石峽書院山長父良玉常山東陽兩縣儒學教諭蓋以文學者稱母陳氏讀書知義理公之生也爲元至正壬戌十二月十七日與山長公寔同初度前夕山長公夢五色芝產門楣翌日公生識者以爲文章之兆公幼秀爽敏惠稍長習古學師事侍講黃文獻公潛是時文獻爲文章宗主天下所師仰然性介特慎許可見公所業端深器之即屬以斯文之

任至正戊子元政衰敝公慨然閱之乃攬天下事勢爲書七八千言上之時宰嫌其切直格不以聞新安程公以文知公爲文獻門人讀其文嘆曰青青於莚永寒於水其子充之謂歟臨川危公素太原郝公遠者圖大梁段公天祐一十有二人列薦於朝不報濟南張文穆公起巖率翰林僚屬又薦之亦不報有齊琦者得傳邵子先天數推言天人興衰甚驗見公嘆曰子充異代人物也公亦知世道終不可爲乃歸隱青巖山中著書立言然深自韜晦若將有所待者歲戊戌大明太祖皇帝親取婺或以名聞遣使徵之公幡然喜曰吾聞大亂極而聖人出齊琦之言良足徵乎即日詣行在上見大喜署中書省掾每商畧機務悉契

上衷益加禮敬語必稱子充而不名間與論文章稱善因命

采故實韻爲四言詩以授皇太子辛丑冬

上親征江西公進平江西頌 上覽而喜曰吾固知浙東有二儒者卿與宋濂耳學問之博卿不如濂才思之雄濂不如卿癸卯春授江南儒學提舉司校理未幾丁外艱乙巳五月服闋除侍禮郎兼引進使時當創國之初禮制多公所定是年冬除起居注嘉言讜論啓沃良多丙午七月除同知南康府事特賜黃金帶以寵勞之公治民本於仁恕而臨之以廉平民咸服之丁未 上將即大位召還議禮明年戊申爲洪武元年南閩初入職方以公出判漳州公宣布德澤復以治南康者治之二年 詔脩元史召宋公濂與公同爲總裁官二月入史局公於史事雅擅其長力任筆削之勞一無所諉成六月拜翰林待制承直郎同知制誥兼國史院編脩官

公掌制代言凡大 詔令多屬焉三年二月奉 詔預教大

本堂公經明理達開導訓諭道光師儒每 召對殿廷必賜坐久則賜飲饌一日在史局渴甚謂宋公曰得昨日

上所賜梨漿飲之吾渴濟矣中貴人竊聞之言于

上即命齎賜之其在翰林未久出使吐蕃未達境召還五年正月又使雲南六月抵其境見梁王君臣而論之曰

皇上聰明神聖新創大業皆天命人心之所歸惟爾有衆僻在西南未洽聲教故遣使者來諭意今能亟奉版圖歸職方

則尺地一民按堵如故高官厚祿不爾吝也否則如魚遊釜中終取夷滅時梁王君臣相顧駭服已有降意會元之遺孽

有自立於朔漠者遣使脫脫徵糧餉且欲連兵以拒我覘知梁王有貳心因以危言必欲迫梁王殺我使以固其意時梁

王持兩可不決因匿公於民間脫脫聞之愈責請梁王不得已以公出見之脫脫欲以威屈公慷慨罵曰

天訖汝元命我朝實代之汝如燭火餘燼尚欲與日月爭

光耶我將命遠來豈為汝屈今惟有死而已寧以迫脇為

懼耶顧謂梁王曰汝朝殺我大兵夕至矣遂被害時六年癸

丑臘月二十四日也享年五十有二娶何氏子二曰綬曰紳

孫男五穆穰稌稔植孫女三人公卒後之八年大兵平雲南

又十五年紳往求遺殯不獲因訪得公諱所擗踊號呼製神

主載回時雲南左布政使張公統及前山西參政王公景彰

力為採搜死事之詳為文以暴白其大節公平生慷慨長身

山立屹然有奇氣人初見之若不敢即及夫一言之入則情

誼凜然恨相知之晚於經史百氏無不究其極其為文宏麗

沉雄機軸貫綜自成一家言天下大夫士爭傳誦之所著有華川前後集二十五卷玉堂雜著三卷詩五卷續東萊大事記七十九卷並藏于家公事

上十餘年服勤報効左右開陳非仁義之言弗道也天性至孝友悌尤至先世田廬悉推以予兄弟其教子慈而有法在官還書戒之曰寧人侮我毋我侮人故二子皆能以文學世其家云惟公之至行大節其在天理人心者故所不泯而紳也復以濟有世契之私幸嘗辱知於公者最久請狀公之行故為撰其大槩以備家乘之闕他日國史置傳太常議謚庶亦有所考焉

皇明文衡卷之六十三

碑

大明勅建太學碑

宋訥

洪武十四年夏

上詔羣臣曰王者受命武功文德相繼成治定天下以武治
不以武也其崇文乎顧茲成均地隘而陋何以振文教朕相
基於雞鳴山下高爽平遠豈天協朕心若藏此地俟興一代
學乎羣臣稽首曰

皇上聖神斯文福也乃以

天子學制授諸冬官冬官臣恭奉

明詔夙夜匪懈榘楠豫樟來積如阜鑿山載石與土築基梓
人效藝以宏其制又遣金吾前衛親軍指揮譚格督其工凡

堂有七彛倫所以會講率性修道誠心正義崇志廣業則諸生肄業所也會饌有堂庖廚有室井覆有亭物貯以庫餼廩蔬園重門繚垣回廊儲書兩堂之間東西有館助教正錄居焉東偏列室鱗次諸生處焉廟在學東亢以增基大成有門七十二賢有廡凡爲楹八百一十有奇壯麗咸稱自經始以來大駕臨役者不一夫子而下像不土繪祀以神主數百年夷習乃革明年五月冬官奏廟學成十有一日天子遣使祀先師以太牢禮畢胄子及民之俊秀登堂受業學之禮制備矣十又七日上躬臨廟禮行酌獻再拜而退乃達學學官率諸生進拜堂下博士臣龔敷執經祭酒臣吳顯講經既畢萬乘是還此千載曠儀講而行之斯文增重矣六月一日

上又賜勅文重諭胄子禁制防遏之法訓迪誘掖之意無不至焉越一日

帝御奉天門詔臣訥文之于石臣拜手稽首不敢以不文辭承命遂述興造始末爲之言曰孔子之道垂憲萬世帝王之興首建太學蓋學所以扶天理淑人心也皇極由之而建大化由之而運世道由之而清風化本原國家政務未有舍此而先者或有未備則無以維三綱五常之具示作人重道之心

聖天子位居君師續道統于堯舜禹湯文武建學定規高出前古凡我登堂養正游藝之士斯言斯誦相勉相誨無負教養則正人端士叢出而爲國家植幹作

聖子神孫之業萬世而無窮者當自今始願臣膚陋敢不對揚

帝命式昭盛代之典文也拜手稽首而獻頌曰
於惟

聖皇臣伏萬方乘時經綸武偃文揚儲慶發祥載整乾綱乃
相學基維鳴山陽平遠高爽非麓非岡武輝京邑隱若天藏
考制定規

聖度曷量乃授工曹孰敢怠違工師用勸效技允臧有廟有
廡有廊有堂鱗比而重龍起而翔登用儒臣教化昭彰佩服
鏘鏘弦誦洋洋正學有傳師道有常

萬乘來臨俎豆生光千載禮儀一代典章躬親講道超軼百
王 聖製昭宣啓迪激昂寵及 阿衿垂範流芳材育化崇般
序周庠立極作則遠紹虞唐德 進英豪業修俊良股肱
朝廷都俞巖廊以弘文化慶祚 靈長願佑 皇圖萬世無疆

勅建歷代帝王廟碑

兩儀判而人極立大統建而君道明粵自上古神聖繼作代
天理物以開萬世大平之治故天地以之而位四時以之而
序萬物以之而育大經大本以之而立盛德相繼傳至于今
欽惟

聖天子受天明命肇修人紀以建民極繼皇帝王之正統衍
億萬年之洪基稽古定制作廟京邑以祀歷代帝王重一統
也相舊廟地介乎通衢褻而弗嚴洪武二十一年秋始命改
作於欽天山陽越明年己巳夏五月三日工部尚書臣秦逵
奏成功請文劓石詔臣訥爲之記臣忝職冒監懼不敢辭謹
拜手稽首而言曰帝王功德於昭于天宜有清廟以宅神展
敬歷世以來祀典斯闕三皇五帝祭於肆類僅見于周而堯

舜禹湯發迹肇基及所經歷之地或有祠焉遣使致祭後世有之至於合廟 京國歲修享禮古未之聞

皇上定鼎江左治功既成神人洽和禮樂明備凡廟祀之瀆禮不經謫神非法者一切去之正名定統肇自三皇繼以五帝曰三王曰兩漢曰唐曰宋曰元受命代興或禪或繼功相比德相伴列像于庭金玉其相衮冕焜煌聚精會神咸宅于茲每歲春秋二仲諏日誓士

上御宸極制命大臣齋明承事籩豆靜嘉染盛豐潔告克告碩神格洋洋所以推惟本始式昭曠典者至矣三年則

命官奉香幣詣陵寢具儀物以時致享又以昭聖顯靈而示不忘也嗚呼天生民而立之君所以靖亂也康濟天下阜成兆民而登之仁壽之域者皆以奉若天道而已是故前乎三

代之官天下者天也後乎三代之家天下者亦天也皇帝之繼作漢唐宋之迭興以至千元皆能混一寰宇紹正大統以承天休而為民極右之序之不亦宜乎秦晉及隋視其功德不能無愧故黜而不與是可見

皇上敦名實重理道崇德報功大公至正之心真足以度越百王垂憲來世永永無斁謹為之銘曰

惟皇作極克配天地丕昭盛化以正大位皇道而皇帝道而帝歷夏商周三王迭繼熙熙同底于治於赫漢祖寬而有制光武奮興炎靈用熾唐興晉陽遂有神器太宗重光力行仁義明明有宋其德克類暨于元氏而亦用又豐功茂德後先輝音翼翼新宮有恤而闕親像既嚴皇靈斯蒞享祀芬儀文孔備陟降在庭神之攸暨祚我

皇明以克永世

追封徐王廟碑

陶凱

洪武四年夏六月丙申

皇帝御皇宮門召禮部尚書臣陶凱諭之曰

皇后父徐王馬氏世為宿州人家閩子鄉新豐里王本民家
素質朴以兄弟齒序人稱之曰馬某王少壯時膂力過人沉
毅寡言笑重然諾而性剛強疾惡見有為不義者視之若仇
讎然或少忤其意輒肆毆擊雖至死無所畏憚鄉人莫敢犯
當元政失馭天下將亂王以忿爭殺人恐逮於法移家定遠
及天下大亂乃挈

皇后母避兵他所而以

皇后託定遠郭氏俾育為己女後郭氏首難自為元帥收來

民兵朕亦為部下士遂以

皇后為朕之配既定天下即

皇帝位

皇后正位中宮封

皇后父為徐王母鄭氏為徐王夫人以他無繼嗣因立廟于
太廟之東歲時奉祭然稽諸典禮古無其義於是即王所居
鄉里闢地於塋封之南作新廟奉安神主每歲以春秋仲月
俾有司祇奉祠事爾宜述其梗槩刻諸堅珉用垂不朽臣凱
既受明命竊惟人受天地之氣以生其得氣之厚而不薄者
性必剛勇果毅然有不得志於當時而澤及於其後者必顯
融光大此理勢之自然也今王有所抱負而無以發舒故常
存疾惡之心其憤怒所洩即以加諸人蓋亦豪傑之士哉使

遭逢盛際必能出將入相垂名簡冊而乃生不逢辰至身歿
之後以

皇后父而得追崇王爵作廟故鄉使山川改觀井里增輝又
豈非一出於天平臣凱謹拜手稽首而為之銘曰

維此徐方代生異人乘時啓運蔚為王臣惟王之生質性過
厚不逢昌時深居畎畝王奮厥怒孔武有力摧強折奸以輔

夏則當元之季天下擾攘聖家避地東南其行英雄陸沉豪
傑未起抱恨重泉吁其已矣山川炳靈遺德所鍾篤生

聖女正位中宮

皇帝仁一聖為天下父

皇后孝慈為天下母太妙嗣任則百斯男聖子神孫何千萬

年川原膺膺新廟奕奕與國同光末世無教

歙縣孔子廟碑

宋濂

歙漢縣也初屬丹陽自吳晉而下雖屢更為郡若州而縣仍
舊名不廢其地為東越奧區號多佳山黟川如龍前行偃蹇
不受羈紫陽問政二山又矗起東南勢若翔鳳鳳凰飛布紫
金諸峯又騰翥于後先而黃山又直西北奇巒之不可名者
凡三十六丹崖翠岑分割陽陰而吐和降精於無窮故士之
生其間者或以氣節著或以道藝名時有其人近代尤稱多
士立言著書動足名家是固因山川之靈攸鍾其沈涵陶育
之者非立學之所致歟初學在縣治之東淳祐庚戌郡守謝
堂始建至大庚戌縣尹宋節至正甲申縣丞葉琛皆葺而新
之壬辰兵起而歙為鬪爭之場官廬民舍焚蕪無遺而學亦
廢矣澹烟荒照榛荆蔽途而狐兔或暮出衝人識者為之徬

惶大息如是者十年辛丑之夏張侯齊來為縣慨然歎曰歛
為徽國文公父母之邦道德之化衣被天下雖時丁尚武而
其鄉學可久廢乎遂請于大府而經營之會故基已更構紫
陽書院遂於書院之東立表考宜剪刈穢荒別畚新土充其
虧窪高爽壇疏有踰其舊中峙王寢象厥正配黼坐朱几嚴
事有容旁圖從祀於兩廡間外敞正門列以畫戟法庭端潔
城平密鞏欄楯翼遮術道直修外為都墉樹以三門上應靈
星榮光昭煥廟左別築論堂直齋以處講師暨弟子員不膏
不侈無訾曩憲經始於秋九月考成於明年壬寅之秋八月
侯帥儒師行釋奠禮牲幣有飭庭燎伊煌罇俎維旅法齊必
芬神來顧歆如在左右觀者歎慕至於詠蹈僉謂侯之嘉惠
吾民者深不可無以貽永久於是教諭江君材奉幣請文刻

諸麗牲之碑惟先王之制自諸子以至公卿大夫士之子使
之修德學道春合諸學秋合諸射以攷其藝而進退之是文
事武備均出於學也所以興師必受成而行及其還也則釋
奠于學而以訊馘告曷嘗析為二哉自世道既衰不復獲沾
先王之澤之盛人徒見提旂鼓而簡車徒者乃指為武殊不
知制勝兩楹折衝千里而有所謂詩書之帥也侯於下車之
初能汲汲建學於用武之日可謂知斯道矣歛之人士尚當
導心一力惇於明體適用之學平居之時則談俎豆而攻遺
經一遇四郊有警則搦戈上馬以收獻馘之功使議者咸曰
是生文公之邦而無忝山川之靈者庶幾不負建學之意不
然豈予之所敢知哉侯字仲賢齊其名也某郡人以行中書
掾擢為令招徠懷集民驩趨之遂成市落縣解驛舍皆新作

之而尤急於農功築呂塌及良干范阮二塚歲以有秋其善政蓋不一而足當時相其成者則丞胡拱辰主簿王某及江君云

臨濠費氏先塋碑

皇帝登大位之三年覩四方之既平嘉諸將之勲烈乃十一月丙申大封功臣爲公侯錫以鐵券俾傳諸子孫於是臨濠費侯自僉大都督府事進開國輔運推誠宣力武臣榮祿大夫柱國平涼侯既而復謂賢豪之生基德累仁必繇于其先乃推榮其三世侯之曾大父五一府君贈驃騎將軍都指揮使護軍追封靈壁縣子大父六一府君贈鎮國將軍僉大都督府事護軍追封江夏伯顯考七五府君贈榮祿大夫同知大都督府事柱國追封平涼侯曾祖妣李氏祖妣及妣兩何

氏皆從其夫爵邑爲夫人命書既下侯用姓... 于先塋榮光赫然照燭泉壤山雲宰木飛揚煥其皆有異氣自是歲時奉祀惟恭侯間謂余曰吾世齒恒岷至于吾躬遭時遇主奮自我行奉命克敵或專或裨凡十八年始于淮江中於閩浙至於定中原舉關陝皆與諸將之列取城邑以數十計其艱且勤亦至矣藉

聖主之德念錄微勞爵爲列侯名載冊書人臣之榮無所與比顧豈吾材之能致哉實我祖考遺休餘澤之所及也惟我祖考皆有厚德爲鄉邦所稱宏址深源誕啓厥後恩數之加允稱不虛茲欲歌頌先德敷揚聖恩樹石墓道俾後嗣知所自出非子孰宜余嘗待罪國史撰次功臣勞烈知侯爲人仁勇有智畧事上御下以忠以誠今又弗忘其先以顯著

遺德爲事可謂知所先後善爲臣子者矣侯名聚字士英其
詩曰

帝乘六龍起江淮東濠泗之間爲漢沛豐維時費侯驅孔虎
雄壯馬長矛爲

帝股肱既定泗濱遂刻靈壁維滁及和一舉而踣孰謂大江
可限南北萬馬飛渡不以羽翼巍巍建業扼江而城旣入其
郭

帝庸作京廣德旣後遂平長興軍聲轟轟四方震驚蠢彼僞
吳假息于蘇愚弗量能自干天誅將命以行以翦以剗獲其
大醜歸宣質缺

帝德如日愈久而晰孰倚冰雪以詫弗拔何閩何浙何勃何
如朽之折如藩之撤閩浙旣清戰征中原巨壘連壘望風

而奔或奔或降追則其根中原卒平萬方來臻

帝嘉治平曰誰之功鐵券丹書錫爵命邦矯矯費侯平涼是
封豈惟其身榮迨祖宗侯有峻爵上推於父維祖甚仁伯于
江夏江夏之先靈壁是子旁及其嬪咸有爵土費侯曰咨小
子無良祖考之休積厚而昌旣有土田又蓄牛羊維曰薦奠
以致孝享大登如几牲碩酒旨費侯泣祀陳豆奠筆擊鼓駭
駭焚幣煒煒費侯克孝祖考咸喜濠民謂侯勇不失身委質
聖君爲社稷臣濠民謂侯貴不遺親玉佩貂冠爲賢孝孫四
海旣同爵勳旣崇曷以承之維孝與忠忠以干 朝孝以于
家繼德無愆第祿是荷

惠州何氏先祠碑

英傑之士立大功而享爵位者非其先基仁累善何能自致

哉然其先有德而子孫不知報祀者有矣知報祀其祖而棄
蔑其祖之子孫者有矣是皆不達禮義之弊也山東行中書
省參政何公其篤於禮義者乎公名真字邦佐世居廣之東
莞至公始遷惠州祖諱發藻元贈中奉大夫廣東道宣慰使
都元帥護國軍追封盧江郡公父諱叔賢贈資善大夫江浙
等處行中書省左丞上護軍追封盧江郡公祖妣鄒氏母葉
氏皆封盧江郡夫人公祖暨父世有潛德鄉稱善士公生八
年而喪父母夫人守志不奪慈鞠嚴教少偉然有志當元至
正中中原兵起廣民王成亦構亂公爲小官卽請而討之已
而解惠州之圍逐叛將黃常復惠州會賊陷廣州公以兵復
之由惠州府判五遷爲江西等處行中書省左丞階資善大
大分省治廣公弟迪以從征功擢中奉大夫廣東道宣慰使

都元帥兼僉樞密院事遂推恩封其二代後合福建江西
一省改拜公資德大夫江西福建行中書省左丞仍治廣州
歲乙巳九月賊挾廉訪司副使廣寧等叛圍廣公禦之踰十
月部將與賊通絕糧道公出避城陷丁未五月復克之明年
制授公榮祿大夫自左丞陞右丞未拜而

皇明兵平江西詔至諭公公舉廣東之籍以降
上嘉公保民順命之績授中奉大夫江西等處行中書省參
知政事洪武庚戌移山東行省越七年以老致其政初公追
思顯融之盛由於先世旣於東莞率族人建祠寘田以祀羣
祖復與弟迪謀悉以其先所遺田儲租入以祭其禰公猶未
慊於心乃以惠州城西之私第爲義祠斥所有私田百餘頃
爲義田世俾宗子主祀事恐族人不知學也有塾以教之恐

其羞服或乏也有粟帛歲賑之嫁娶喪葬有以助之疾病疲
癯有以養之懼其久而失其意也爲書以訓之俾嗣弗壞而
來請銘嗚呼先王所以親民善俗之道遠矣賢人志士欲推
之於世而勢有所不能欲退而惠一族化一鄉而力有所不
逮者有之至於勢足以爲而不爲力可以至而不至者亦有
之此所以越數十世而事曾不一二見也惟公奮自韋布夷
盜保民輯寧南服致位尊顯卒能識機效順戢歛干戈爲民
請命使嶺南之民不易市肆又能推本反始孝于祖宗惠及
族人所踐所言允可爲法其於富貴可謂不苟處矣視被特
險而賊民私厥身而忘其所自者其賢豈不多哉是宜紀行
載勲著之樂石以爲後嗣式其銘曰

昔至正德否亂生海沸山崩靡人不兵額額粵南在嶺之

外倡賢嘯呼民罹其害何公曰嗟我民何辜告于大藩請行
天誅乃戈乃及乃糗乃糧大旆修折人莫敢當叛將肆凶賊
我守邦雙門疾呼鼠拱以降曷以褒功躋于左轄巨鉞良弓
左旄右節豈惟其身錫爾祉考峻爵崇勲以顯忠孝祖考榮
矣子弟孔多寶帶銀章威儀甚都邦人聚觀拜伏稽首按轡
徐驅詢其耆老耆老有言大哉公勲元衰不君公其我臣公
曰吁哉我志已定待彼有德爲汝請命赫赫
大明洸洸仁聲震于南荒勢無全城公束干戈載封版籍錦
韜龍函獻于京國

帝嘉厥功不勞我師錫燕彤庭重瞳屢回大江之西岱宗
之東祿食十年執政廟堂寅畏恭勤髯鬚盡白詔優老臣勿
勞以職公歎謂人我德何爲祖考之惠幸以弗隳豐湖之西

有第奕奕玄楹文牖既闢且恤亦有土田被隰包原重繆荐
年歲登百千我第以祠我田以祀祖考之休敢恤吾嗣池有
穹魚圍有嘉蔬以醢以殖丹荔清醑剖豕擊羊來丞來嘗孫
子咸臻有維鴈行或授以罍或奠以筆登降肅然莫敢叱咤
數具禮全陳几布筵孰爲弟昆孰爲子孫公曰族人亦孔之
夥揆本追原咸由於祖祖病在指四體靡寧奈何一身曾莫
胥矜爾餒爾寒我有粟帛爾昧弗通我學爾迪爾有災害我
則戚之或有燕喜則慶樂之我有爵祿我祖之故不私吾身
弘祖之祐豈無鄙夫爵祿是荷惟家之肥遑恤其他維公克
仁仁以保民惟公克孝尊祖睦親嗟爾後人惟公是師繼承
無忘公有訓辭

上虞縣重修柯韓二牐碑

上虞有湖名夏蓋延袤一百餘里縣東北衆水經上妃白馬
二陂匯于湖醜爲三十六渠支分絡聯以達于田凡溉一十
三萬畝有畸渠之下流建二石牐視時溢乾而畜洩之歲恒
無凶者近代農官失政畚土成塍取給一朝不旋踵而圯傍
縣亡賴男子當旱曠時又夜半決防以去然湖竝于海鹵水
或乘潮入善禍稼舊嘗造隄捍其衝潮汐齧蝕至是亦暴潰
民憧憧告病矣乃洪武辛亥冬臨淮唐侯鐸自殿中侍御史
出守會稽上虞會稽屬縣人士羣走白侯侯愀然涕寧行海
上視決堤與民共約度田以會粟因口以賦庸鑿石爲隄自
蓮花池至纂風合萬有三千尺始與故石爲隄屬侯斬牲饗
海神已登民謂曰隄幸成一牐無難者會侯召入爲卿奉常
遂命僚屬集事其柯家牐廣二十有四尺深如廣之數而轟

其一先築土樹檠櫛比星攢度久且不壞方敷以石兩翼四隅咸欽甃如法中峙石楹左右皆有副鍤坎陷版以爲縱閉復隨土形崇庳疏級爲五以瀉水上架石梁以便行者檠以章計者九百八十有五灰以斛量者三百六十又四石以丈數者七百三十有八匠以日考者一千三百其韓家牀廣減前牀之半深比廣倍之石楹唯二級道則減其一仍冠以石梁餘皆同其工物視前匠損四百石損五百灰損六十八檠損二百八十五始事於甲寅秋七月訖工於冬十有一月此其大凡也有道浮屠雷峯淨昱乃具事狀介太史氏朱君右徵濂文記其成予聞成周之時猶人掌稼下地以潴畜水以防止水以溝蕩水以遂均水以列舍水以澮瀉水其爲法甚備其爲利至久也然而溝澮之屬所可考者其深廣自四尺

至八尺或至於尋仞各二先王豈不知害地而廢稼以爲若是則水性失其常溢則有溺患乾則禾將蓄矣古制不可復見有能設潴防以惠民者得不謂之賢哉昔者曾文定公之爲齊州州城西北有湖疏爲水門遇沆潦暴集則取荆葦爲蔽納土於門以防外水之入公爲易之以石其深八十尺廣三十尺視水高下而閉縱之而禁障宣通皆得其節人無後虞今唐侯之爲牀也其事與之頗相類世言古今人不能相及果足信之歟是可書已相其成者通判府事吳敬知縣張翼營度督視不憚勞勩者主簿史文郁也司其出內則邑大姓徐某余某法宜牽聯得書海堤別自有記茲可畧云系之以詩曰維夏蓋湖百川所豬在彼海邦其一釃爲通渠行水委蛇漑稻與杭其二制水有牀因時闢闔其法孔臧其三

農政斯缺惡壤為竭水失厥防其四侃侃唐侯爰諮爰誨中
心盡傷其五曰是弗修民焉有秋敢視為常其六乃登冢屬
乃謀乃告乃輯其長其七晦會其粟工來以族筮日奏功其
八琢石于山樹糜于灣以捷以梁其九決塞有關既堅且完
若首有肱其十昔何怒突今乃順則弗隳我疆其十一行彼赤
日清流瀟瀟黃茂芄芄其十二食維民天非稼無年民用卒爽
其十三伊誰我憐五馬翩翩朱衣葱珩其十四成周之制有溝有
遂經畫維良其十五古法寢廢河渠興利其效則章其十六漢吏
曰循惠乎丞民唯此之譽其十七矧乎鉅津比枕海濱澤被五
鄉其十八侯治之棘行厖心惻不翅父兄其十九越石可泐越州
可竭侯功勿忘其二十

皇明文衡卷之六十三

皇明文衡卷之六十四

碑

孔氏家廟碑

胡翰

先聖孔子生于魯實襄公之二十一年至昭公十一年而薨
門人會葬明年即其故宅為廟祀之藏衣冠琴瑟車書廟中
漢高皇帝世祖皇帝明帝章帝安帝皆親幸闕里祠以太牢
之禮雖魏晉南北朝用兵文帝黃初武帝太始皆詔修廟祀給
灑掃守衛歷宋齊梁及拓拔魏高齊之有國遂續承為令典
方是時天下未有廟也至唐武德而後國子監有廟至開元
而後郡邑有廟天下通祀之而家廟則惟魯存焉乾封以還
車駕東巡者悉修漢故事周太祖平兗州以人主之尊伸北
面之拜如弟子禮情文崇極徽號屢加常以宗子一人襲封

爵四時饗祀在宋曰衍聖公靖康之難衍聖公友端扈蹕南渡與其從父傳俱家于衢襲封如故而廟祀闕焉寶祐初郡守孫子秀請于朝始賜田五頃建宮墻于郡東北菱湖之上廣至二百餘楹事具庸齋趙汝騰記後燬於寇廼徙城南宋亡元氏改物至元間曲阜之宗子斬其後以端友之孫洙當襲爵降旨徵之洙入朝固讓特授國子祭酒歸守江南廟祀廟故書樓其制非寶祐之舊會兵革益圯壞不治己亥秋王師取衢州制以分省郎中姑孰王愷董郡軍民事公讀書通達治體至卽明法令布恩信與百姓更始謁拜廟庭以爲水木本源所繫不可無以示衢人命有司葺而新之告成之日族之長者少者衣服冠而趨旅牲幣于庭敬共將事願紀成麗牲之碑用侈公之賜翰惟孔子之道如天之高地之厚

日月之明四時之運有不得而贊者取其故實書之以見書仁義之澤罔有窮極所以立生民之命開太平之治者帝王賴之咸致尊禮非他享祀可例由春秋以來傳序五十有三世廟于魯者禮也舍魯而南者宗子去國以廟從焉亦禮也禮之所在君子慎之况其子若孫人將曰此聖人之後也將以聖人望之崇德象賢異時太平修復舊制是宜有引無替昔周有清廟魯有閟宮至今歌咏不足使人想見盛德之美翰雖不敏敢緣古義再拜而系之詩曰

奕奕新廟有嚴孝祀誰其尸之文宣孫子續緒魯邦世載厥美作廟于南會通之禮

皇祖在上監無遐邇邇大夫師長百工庶士保有天常寔受王祉矧茲具瞻俾就傾圯顯允王公載振而起聿來孫子于公

率履弁舄裳衣陟降庭祀黍稷黼黻薦則有體亦有旨酒式
燕以喜盛德百世表是南紀匪南紀是表魯邦是啓惟聖是
嗣孫焉及子言念伊始

越國公廟碑

越國有廟故參知政事胡公之將士洎邦人之所作也公歿
之明年衆咸戴公之德慕公之爲人營建廟像于郡城之中
區廟成之明年 朝廷嘉念公忠壯寬厚扶翊興運弘濟艱
難身歷百戰功冠一時不幸死於肘腋之變不可無旌卹之
典於是特贈光祿大夫浙東等處行中書省平章政事柱國
追封越國公遣宿衛之臣馬哈謀致祭于祠敘述厥勞哀悼
懇至罔有儔比公之冢于德濟拜手稽首奉揚休命以爲先
臣大海一介甲冑之士誤承 眷遇列備戎行自起義以來

王師取和州渡江而南下太平進攻金陵保有其城遂東克
京口以及毗陵西南拔宣歙以及睦州由睦而東婺爲巨鎮
婺下衢處皆平廣信亦平

天威震疊兵不留行先臣嘗受命前驅不敢避鋒鏑矢石之
危以率先士卒摧殄勁悍所至郡邑輒下未嘗以金帛子女
之故妄事剽戮衆爭向附遂膺大任叅大政被 國厚恩恒
思以死報社稷御下悉推赤心待之冀得其死力耳故雖軀
刃不悔也先臣旣沒 國家益用兵上流舉湖湘漢沔之地
於反掌之間又通巴蜀拊循嶺海又北城襄陽臨中原而扼
其項背綿地數千百里先臣曾不獲與諸將分其同苦竭肱
股之力効尽寸之勞於疆場是則天也
皇上以乾坤之量日月之明兼覆廣照不求備下臣旣起臣

德濟於衰經之中授以兵柄襲有爵位又追念先臣之勞錫之封號登秩上公克有享祀于婺之人以焜燿其後嗣子孫先臣有知且不死矣臣聞因物之精制爲之極明命鬼神以爲黔首則若先臣之鞠躬盡力馳騫一世其氣發揚于上宜不可揜故有不虞之警往往於夢見之鐵面長身毅如也蓋其志不忘 本朝如此德濟不武典守東陲不能翦滅仇敵以雪先臣之恥昭 國家之賜唯君臣父子之義惡能已哉尚爲我載諸麗牲之碑翰觀古將帥之臣有志不展而功業未究如岑彭來歙祖逖李嗣業者天遽奪之故公之功烈惠澤被于江左淝東決于婺之人使天下望之而不加焉此其可扼腕也大烝之禮先王所以崇德報功者無所不用其極則斯廟之作非臣子之私於國家實宜之蓋禮之以義起者

乎乃詩以歌之曰

皇奮厥武者定爾民疇若先驅則有虎臣虎臣桓桓如林之般允也胡公實邁乃倫昔在有元雲雷邁屯失其金鏡華戎紛紜天造有邦肇域淮濟俾公來輔鐵面長身爲國爪牙克壯且仁秉戈山立超距川躍以步易騎動罔不獲左則左攻右則右斫所向輒靡何敵不却何城不隳土宇斯拓自西徂東淞水洋洋公來制閩于睦之疆于以秉鈞于彼東陽連城惟五如水有防龍節鳥章弓矢受折背德者誅歸斯用臧邦有螟蟻公則是取鄰有封豕公則是拒不饑由公我哺不札不瘥由公我袂公之於婺孔惠且時匪是我私王國是毗國有瘼猘人莫之知反噬而逞孰拯其危左右庶士小夫及羣相視咨嗟惟公是悼僉曰悼之尚罔或報赫斯不忘是

用作廟作廟有奕享祀不忒先王制禮以致崇極嘉迺有德
洎乃丕績曰惟大烝相古作則揭虔妥靈有祠伊闕
皇命使臣聿來稱秩最其勤勞爵以越國惟越國公肅然冷
風志不克究澤則罔窮公今有子亦公是似踐其有位敵王
所愾教忠之訓有永無替繼自今始其祀百世

敕賜滁陽王廟碑

張來儀

洪武十六年十一月七日

皇上親蒞滁陽王事實召太常司丞臣張來儀諭之曰王之
恩德注在朕心今滁有廟祀而碑刻未具甚闕典也汝其據
此爲文于石臣來儀謹再拜奉一敷謹按王諱子興姓郭氏
其先曹州人王父少好術數常從異人遊得其書年長未娶
南遊定遠邑人神其術將有爲叩之必驗邑中富翁家有處

女以瞽未許嫁王父過其門翁以女命求卜數成曰此貴人
也翁曰瞽未配五父曰翁能不鄙我乎則妻之翁曰諾既而
娶不數歲夫婦家日贍生子三女一王中子也始生父卜之
喜謂人曰是兒得佳兆異日非常人必大吾家既長兄弟別
籍三人皆善殖產元末民間有造言者王誤中其說信之甚
篤忽不事業而妄散家財陰結賓客至正壬辰汝穎兵起王
識天下當變乃召所結賓客子弟拔濠梁據之時

皇上潛居民間爲訛言所逼懼禍將及遂挺身入濠梁抵其
城爲門者所執將欲加害人以告王王親馳活之撫之麾下
間召與語異之取爲親兵居數月王謂曰汝輩居當爲汝婚
王暮歸與夫人飲食語及斯事次夫人忽惋惜謂王曰方今
兵亂正當收召豪傑是子舉止異常若不撫於家而使爲他

人之親是失智矣王悟遂以女妻之

孝慈皇后是也王爲人勇悍善戰時軍帥四人名位皆在王上王素剛直不屈人下每遇事四人瞋目語難而王剖決通敏數以非語侵之衆故忿忿未幾客軍首帥彭趙以兵來駐濠二姓皆僭稱王王等遂爲所制一日衆挾趙勢拘王於獄將害之

皇上自軍馳歸或曰勿往曰再生父母有難可不赴乎遂入王家明日彭帥聞遣人釋王以歸明年夏還故里收元卒七百獻王王就令將之又明年夏染末疾未差王聞元義兵欲歸將說之左右無可使特過寢門示意趙趙因請扶疾往卒說降之得其精卒三千既而彭趙亦屯泗州因挾王以往時皇上方駐滁陽知衆不可其事獨留守以待復遣人賂彭趙

左右賂行王得縱歸滁陽王兵共四萬其麾下僅萬人

皇上所部三萬有奇明年乙未主命守和陽既而信流言親至和陽視師值王警人亦駐其中聞王至移軍異處

皇上禮送行者俄爲所艱王聞驚懼得疾尋卒歸葬滁州夫人張氏生三子長戟沒次爲降人所陷幼與羣小陰謀伏罪次夫人張氏生女一爲妃生蜀王豫王如意王女

二洪武元年天下旣一剖符行封追思更生之恩寔

帝業所始乃封滁陽王建廟墓陽命有司歲時率滁人祭之臣來儀伏聞自古帝王之興雖受命於天未始不因乎人蓋必有所佑助維持而後成及其旣成也其所佑助維持之者亦得與以享其榮傳之無窮而施之罔極惟我

皇上奮布衣提一劍而起外無天土一民之助而王能脫危

難識潛微納于貳室授以兵柄慨然不少吝惜遂肇大業可謂有知人之鑒矣及今大統既定四海一家推本尋源寔由於王爰建顯號俾永永血食蓋非王無以開萬世之業非皇上無以求王之名臣謹卽是爲銘銘曰

皇受 天命發跡濠梁方其始興附于滁陽滁陽先知識

聖於微 聖有大難上脫其羈取彼神龍翼之風雲浴日咸

池滌其垢氛龍騰日升伊誰之功有相自天寔啓王袁

皇奮無旅王命予之

皇室未媿王命女之謀行諫從肝膽弗疑萋斐之言終莫我

離秉鉞專征付以關外顛強感驕有衆日大變生不意卒疾

于驚何啓其緒弗享其成

皇明日昌旣臣萬方剖符錫爵乃侯乃王爰念舊恩極天罔

報一飯必酬矧有大造乃封大郡乃建廟庭乃復滁人護其
園坐祠官孔嚴報祀春秋壘酒釃羹黍稷羊牛王其來歆毋
曰無後王女

皇妃三王挺秀王支百世王有廟祀焚焚者雄孰王之似小
臣受 詔作此銘詩勒著貞珉以求無期

徐文清公祠堂碑

朱廉

宋徐文清公祠堂在義烏縣南四十里之赤岸赤岸公里也
公之被讒及奉祠家居里士朱府君良祐尊賢尚德誠意懇
至命三子 中 受學於公凡公賈田築室之事府君悉心

左右無遺力又度里之勝地作適意亭日與公遊息其間當
是時公之高節大義聞天下賢士大夫皆有企慕不可及之

歎而府君與遊相得驩甚三子在門又皆力學有立朱氏由

是益大其後子姓聯登科第者接踵其經學行誼政績皆有出於人衣冠之盛久而弗替淵源所自實本於公今年春乃相率就適意亭故址東偏構堂以祀焉既又合辭謂廉曰公之歿當有祀於鄉而淑於我朱氏者爲大是以有今尸祝之宇吾懼後世彌遠而弗知也子其著文鏤諸貞石以示將來廉府君五世孫而私淑於公者爲尤深辭以無文是志本也謹用據取宋史傳文繫銘其下使後之薦奠於斯者仰瞻德義興起於學而毋敢怠忘傳曰公名僑字崇甫淳熙十四年舉進士調上饒主簿始登我文公之門文公稱其明白剛直命以毅名齋入爲秘書省正字校書郎兼吳益王府教授直寶謨閣江東提點刑獄以忤丞相史彌遠劾罷寶慶初葛洪喬行簡代爲請祠迄不受祿紹定中告老得請端平初與諸

賢俱被召遷秘書少監太常少卿趣入覲手疏數千言皆感憤剴切上廟主闕下逮羣臣分別黑白無所回隱理宗數慰諭之願見其衣履垢弊愀然謂曰卿可謂清貧公對曰臣不貧陛下迺貧耳理宗曰朕何爲貧公曰陛下國本未建疆宇日蹙權倖用事將帥非才旱蝗相仍盜賊竝起經用無藝帑藏空虛民困於橫歛軍怨於指克羣臣養交而天子孤立國勢阽危而陛下不悟臣不貧陛下乃貧耳又言今女謁闈宦相爲囊橐誕爲二豎以處國膏肓而執政大臣又無和緩之術陛下此之不慮而耽樂是從世有扁鵲將望見而却走矣時貴妃閻氏方有寵而內侍董宋臣表裏用事故公論及之理宗爲之感動改容咨嗟太息明日手詔罷邊帥之尤無狀者申儆羣臣以朋黨爲戒命有司裁節中外浮費而賜公金

帛甚厚公固辭不受侍講力開陳友愛大義用是復王子竑
爵又請以周敦頤程顥程頤張載朱熹從祀孔子以趙汝愚
配食寧宗皆從其請金使至公以無國書宜館之於外如叔
向辭鄭故事忤丞相意力請休致理宗諭留甚勤遷工部侍
郎辭益堅遂命以內祠侍讀不得已就職遇事盡言以申前
請乃以寶謨閣待制奉祠卒謚文清嘗言比年朱文公之書
滿天下學者不過割裂掇拾以爲進取之資求其專精篤實
能得其所言者蓋鮮故其學一以真踐實履爲尚奏對之言
剖析理欲因致勸懲弘益爲多若其守官居家清苦刻厲之
操人所難能也銘曰

侃侃徐公實踐真知國之正臣士之碩師天與之氣清明剛
而不與時當宋之季權奸柄國婦寺蠱之崇論塞賢抑鬱

莫施進必以義亦列禁近凡所對揚直辭凜凜知有國耳焉
知貴勢我位可貶言不可避周程從祀趙相侑食濟王復爵
皆公裨益學之所宗自我文公啓迪俊髦澍雨春風赤岸之
里有斐朱氏數百年來冠紳濟濟或立于朝或任煩劇文爲
國華行爲士式端緒所開伊誰之力里有吉土公昔遊焉雙
流右會雙峯列前有堂崇崇祀公其間公所授受斯道之脈
道在人心精神罔隔豈必子孫而後歆格道之無疆公神不
亡春秋觴俎牲酒鮮香明明千載安侑斯堂

岐陽武靖王勲德碑

蘇伯衡

故征北將軍開國輔運推誠宣力武臣特進榮祿大夫右柱
國同知軍國事大都督府左都督曹國公追封岐陽王謚武
靖之薨明年洪武十九年月日 詔王子羽林左衛指揮僉

事景隆嗣爲曹國公既拜命使謂伯衡曰先王際逢昌運受股肱心膂之托感激圖報稱萬一畢志竭力死而後已分也皇上仁聖嘉念不忘褒卹之典備極哀榮今又不以景隆無似俾龔封嗚呼觀 國家恩數之優渥美則先王獲

上之有道可知矣不有以表者之是景隆忽

君之賜泯親之善無以昭示天下後世也願有請於子爲文而刻諸石伯衡受其言而思之

皇上誕膺天命統一萬方羣材輻輳共爲

帝臣傑出其間而受上將之任者固非一姓至其生建國爵而死啓王封者僅四人焉曰徐中山王曰鄧寧河王曰常關平王而岐陽王其一人也被三王者功業懋矣視王之不戰而城降不殺而人歸則有間且僞吳之滅由王覆之諸全元

祚之終由王感之應昌遠若西蕃之地無不涉歷而疆

所謂有以服人於智力之外而動蓋世者哉

皇上眷遇加異無間存歿固自由此非徒以肺腑故而崇獎之也是誠不可以無述伯衡末學雖無能發揚願嘗隸太史氏矧嘗獲望餘光而辱容接何敢終辭乃爲考其客白範所爲狀序次而顯詩之王以甲午冬見

上於滁陽

上喜甚子字之而擇師教之王亦奮自淬礪

上察可任大事一日出其所業示近臣曰是亦可矣當習之

馬上從濟江歲丁酉以舍人統帳前親軍策應池州道戰僞漢梟將余蠻子走之引兵攻下青陽石埭太平旌德戰元阿魯灰院判萬年街敗其軍猫獠於潛昌化進拔之盡獲其婦

女畜牧輜重士卒志滿殊無戰鬪之志王曉以此何足道誠克立功富貴不可言况財物乎士卒悟乃焚所獲轉戰淳安襲破偽洪元帥寨千餘人皆降從克嚴州時嚴新克城壁不完偽猫軍水陸猝至王帥兵踰烏龍迎戰大敗其陸軍即後列俘馘順流而下水陸望見驚愕引去乃繕城隍樹樓櫓為不可犯之計移兵攻諸暨克之壬寅被旨即嚴開省控制東南猫將之戍金華曰蔣英者戍胡越公而作亂也微王星夜馳入城金華幾淪盜區矣諸暨守將謝再興之陰結偽吳以城叛也

上命直諸暨之西作諸全州再興導吳軍鈔東陽浦江義烏使我疲於奔抹以撓我版築王提兵四面應之寇計不得行而新城完矣偽吳司徒李伯昇之擣諸全也兵號二十萬壁

壘亘十餘里報至之日

廟

堂不覺失色王不待詔以所

部馳嬰其鋒軍龍潭諸全主

將以衆不敵為王危之間使請

避之俟大軍至共舉萬全王

笑曰何以避為在昔衆為寡所

敗者何限獨不聞昆陽淝水

之戰乎兵在精不在衆何以避

為乃下令曰今日之事唯致

死力則無不捷捷則敵之資若

等囊橐中物也敢有貪圖獲

而戰不力者以軍法從事兵交

將士皆奮策馬從數十騎

出敵背鏃槩衝其中堅遇者應

手斃陣動塵衆乘勢縱擊人

馬交馳戈甲戛札遂大潰城中

亦出兵夾攻同聲騶叫振動

天地斬首數萬級俘將七百人

卒萬餘人其自相蹂躪與陷

溪水溺死幾盡脫去惟伯昇及

其親從數人鎧仗委棄盈野

偽吳兵力自此焉衰大軍未啓

行而捷書至也入見

上慰勞王悉歸功羣帥若無一毫已出者
上遣中山開平兩王總諸衛兵攻蘇州而平浙獨以屬王遂
進兵桐廬新城富陽隨下獨餘杭以謝再與五子在懼益固
守王曰以李司徒二十萬之衆不能抗我爾以一縣而欲吾
拒乎急攻之終日而拔將校請屠之王厲聲曰二三豎子逆
命耳餘何辜焉不屠行未至杭守臣潘允明使其員外郎方
彝走軍門見王王問彝何以來對曰
天兵如雷如霆當者無不齏粉杭城生靈百萬前矛且至人
人恐恐然及明公所至布宣德意勞來安集閭閻之民骨肉
完保至于鷄犬亦莫弗寧又人大悅曰王者之師也惟恐
來晚我守臣以爲民情如此天意可見矣夫誰與明公敵哉
不知頓首乞降民有更生之望軍無就死之憾以故使彝來

耳曰勝負未分而請降無乃太早計乎對曰兵至城下雖欲
降且無及矣王燭其誠留宿帳中明日遣還報允明即日棄
百司降王入軍容之盛紀律之嚴君子比之淮安王之下宋
且以謂淮安王之下宋也猶待往返約降今不約而降殆過
之矣紹慶台温皆款附丙午冬十月十有一日也不出期月
不血寸办平一大方面而攻蘇者丁未九月始破之縛士誠
送京師明年洪武建元之春閩將陳友定之衆騷動

命王帥兵殄之王往知閩溪等砦大率未享於新政柵窮崖
絕谷以保族逃生納其降而建州劔州汀州悉定竄匿而嬰
孩遺棄道路者踵相躡也悉收養之父母來識認還全活不
可勝計其秋大軍取燕都元順帝出走而燕都以北諸城堡
猶城守宜濟師二年春拜副將軍以往由遵化度廉兒嶺敗

江文清軍於錦州次全寧遇也速丞相軍與戰連敗追至灤河斬宗王慶王遂圍大興料其必潰而遁乃八分千兵伏要害虜果宵突圍遁去遇伏遮擊得去者無幾禽平章鼎任斬轅門進克上都其秋開平王薨于軍中其軍

詔王併將之遂併將往援慶陽從涿州過真定渡滹沱河出井陘口至大原而中山王已拔慶陽矣聞大同急集將佐語之曰

上委我與若等汛掃旃裘殘黨今慶陽已拔而大同受圍則移援慶陽之師以援大同豈非

上所以委我等之意也一軍皆曰主將言是主將言是乃由代郡踰鴈再至而至饅頭嶺禽平章劉帖木穆馬邑縛繫虜四大王白楊門前軍距大同四十里營馬王至曰此豈駐兵

地乎虜設來犯難為備矣麾之前五里阻水列營是夜虜來攻營王高枕若罔聞知以二營委敵使自為鬪天且曙王徐起不介馬分左右翼鼓行疾馳薄其陣聲撼林木城中探知王至開門驅衆赴戰虜腹背受敵靡地而殲之流血膏野追北至炭峇獲其名將脫列伯生口以千數馬以萬數其車輜雜畜悉為鹵追兵至莽哥倉乃還順帝之出走也屯昌州蓋里伯遣脫列伯等攻西京規克復至是始北奔三年王以征虜左將軍致討師出野狐嶺與和守將降察罕脫兒其將又降乘銳夜襲應昌克之元太子騎而獨奔去執其子買的里八剌及兩宮后妃宮人玉冊金寶歷代重器致之闕下追奔不及還次中興禽汪國公暨其士馬松州利州之間隘曰虹螺山殊險絕世家貴族率保其上師過爭脫甲投仗出降

王撫以恩信散歸已降之郡親屬流落行間者訪問還之其
各大封功臣 召還初王以帳前總制親軍都指揮使兼元
帥守嚴由指揮樞密同僉由同僉左丞爲右丞在嚴十年浙
江平拜榮祿大夫本省平章政事至是加開國輔運推誠宣
力武臣特進右柱國同知軍國事大都督府右都督曹國公
食祿三千石 賜鐵券四年兩川平

上憫其民新脫鋒鏑以宣撫付王時月之間民大和浹五年
依舊與中山王征迤北而東道兵則王節制次可溫虜棄營
走哈刺莽來尋益北走王曰虜褫魄矣可襲而禽我當輕兵
兼程而進乃留輜重廬車河人持二十日糧深入至土刺洞
其將蠻子哈刺章悉其騎渡河陣而待部署我軍而兩之王
自將一軍從流上而與之合一軍將以都督華雲龍從流下

以分其勢有健將出衆豕突而前王發矢殫之虜舌吐不能
收遂戰兩軍犄角且戰且前至騁海而虜騎滋多乃整險樵
牛具食謗爲犒大軍者虜疑相牽解去留騁海三日全軍而
還失道乏水軍多渴死王以爲憂次歌而麻思行尋水處忽
所乘馬蹄地出泉軍得以無渴若有神助云還次代郡其明
年將出朔州者生致太尉盧伯顏不花其明年春分兵出討
一軍出三不刺赤昌侯監玉將之一軍出楊門都督張其將
之一軍出白登指揮景其將之其秋攻下大寧高州大石崖
虜將番平章陳安禮木屑飛若宗王朶朶失理真珠驢若鄧
國公孛維帖木兒若丞旨百家或斬或禽而北地悉平後一
年秦王晉王之國皆王扈北還遭隴西王喪居憂後一年西
番平起郡縣其地第隘都城扼其喉襟還至西安以其民病

離水也言於秦王穿渠貫城中通九龍池水以利之汲者飲者皆額手謝自後留中叅決朝政蓋勳戚而賢無右王者上屬意久矣以征討事重故未暇也王出入大內上所嘗履地未嘗敢蹈其小心謹慎如此又所區畫動合旨意

上益愛重之侍中坐論康濟之道往往至夜分王感見信之深見問之切披肝瀝膽以效啓沃裨益弘多諸所見聞外間無得而聞亦無得而著然天下稱之其風烈可想見焉乃仰望以致太平而十七年三月戊戌竟薨于位享年四十有六其豈非國之殄瘁民之無祿也夫故薨之日

上為之震悼三日不能臨朝天下莫不欷歔痛惜焉於戲天生

聖人繼開正統王出而任專征之青馬首所向如風偃草都望郡以及部落智者謀無所施勇者力無所措靡然稽顙而降附小夫牧豎深閨婦女聞王姓字愛慕如父母於是舉羣雄而脫距角合四海而登于混一非體

上之深仁弔伐能如是乎抑亦可以表王之盛德矣王為人寬裕而周密明察而嚴重樂善而好問容衆而汎愛心不和於貨利志不惑於聲色喜愠不見言笑以時凡行師未嘗妄殺旅拒攜貳者不得已加兵吏卒犯令按以軍法輒慘然終日不擇部曲或病親視醫藥却卒死其遺孤無所歸教育之材者請官之百戶陳恭戰死其子從母嫁李乙乙後犯法吏議籍沒其孥王曰妻非陳妻子固陳子也奈何沒入入奏出之大同之捷執其名將脫列伯以至王釋之延坐共飯其他

故官名在俘籍隨材收敘不使失所浦江鄭氏聚族而居者
十世元末兵爭之際舉宗避而去之山谷間王下令召還而
戢士卒不得入其里門毀傷其室廬王蚤師當塗潘廷堅後
過當塗必謁已然後就舍館在浙東時金華老儒葉儀范幹
胡翰從王招延講聖賢之學王敬事之不管弟子之於先生
及位中朝致書候問入再拜而授使者今國子博士致仕吳
沉嘗以王之命長釣臺書院食其俸以餬其口而有司勾考
錢糧追其俸為斛七十王度沉貧不能償遂代償之賓接賢
大夫士分庭抗席而坐不以位望隆重有幾微驕矜此皆人
所難能唯王德之盛是以行之無難矣於其所薄者猶然况
於其所厚者乎晨夕必展謁家廟時祭必齋戒三日在隴西
所言必稱小字祁寒盛暑必冠帶侍立不得命不敢退容

政無大小不稟命不敢行痛公主之早薨言及必涕泗交流
其歸改葬也行距茔域里所下馬括髮跣哭如初喪喪隴西
王也絕口饘粥七日淑德夫人喪亦如之此豈勉強乎哉嘗
自言幼時讀書不滿十月然於經史奧義帝王為治之要古
今理亂盛衰之故無不周悉上表奏每館客具藁能指摘其
瑕類而潤色之代祀泰山賦詩十有一篇雄渾而溫雅有古
風人之思他述作稱是乃知天壤之間間氣所生固自無乎
不學而能究而言之豈非所謂名世者乎謹按王諱某文忠
字姓李氏泗州盱眙人高曾祖考封贈不錄子男三人長今
曹國公也次某次某女二人壻曰其白其孫男一人某女一
人尚幼王薨敕葬鍾山之陰神道有銘而又有家廟碑今董
張二公之又具存王平生嘉言徽行此有不重述者可考見

馬詩曰

聖神受命為天下主豪傑景從其來如雨則莫若王材全德
鉅天實生之為

帝心膺王初上謁年未三五

帝曰朕甥鞠于內府訓之迪之允文允武乃命之將統茲禁
旅整城勅敵一鼓而取維時浙左立國攸恃不有親賢疇堪
付畀乃申王命於斯總制龍節虎符內綏外禦德威惟威近
懷遠企有苗臣附方亦委質彼悖者張獨罔顧忌水陸入寇
輒訶而去乙巳之春哀厥精銳偪我新城侮我無備邊吏驚
告王曰何畏提兵問罪蹂以突騎鼓躁乘之聲撼天地譬以
戎輅輾彼塘臂其軍廿萬幾無噍類既覆其軍遂奪其氣姑
蘇之克由是而致姑蘇克矣浙江平矣台温慶紹莫不寧矣

殂彼七閩廓其清矣大軍雲合取燕京矣

帝謂王來成筭陞受婉妻元君雖云出走尚聞假息欲圖進
取汝師汝督往扼其後王辰奉辭行不逮酉烝徒肅肅晏及
雞犬得地得衆易於拉朽或擒或誅莫匪戎首額額應昌連
逃淵藪不虞我師奄至左右俘厥孱王以及妃后豈無寶玉
亦有璽綬奏凱來朝喜動宸極都督上公特進柱國鎔金
為券以莫不錫王拜誓首大勲之集

社稷之靈

天子之德亦師之武臣則何力元社雖屋元運雖訖餘孽猶
存臣遑暇逸請揚天威覃彼有北

帝曰俞哉朕固汝必歲凡三周師凡六出何深不入何城不
克何強不服何醜不獲豈曰窮兵爰拯其溺均吾赤子何謂

戎狄遏彼西番白日所沒王且往釐申畫郡邑矧茲全蜀其
有不卹文軌既同大統以一
帝有溫詔汝克輸忠弼成鴻業樹此駿功尚左右朕圖惟厥
終文致太平虞周比隆王拜受 詔夙夜在公以經以綸忘
其瘝痾三旬在告邁茲憫凶 朝則有士野則有農茹泣相
弔吾將曷從我謂我王間氣所鍾生為人英歿而愈雄在天
乘雲上下從龍為雨為霖品彙其蒙况也嗣子綽有王風責
難陳善祗事 兩宮繼志述事式和華戎潤澤所被中外攸
同則王汝祚寧有終窮豈以死生而殺而豐是用作詩以告
萬邦

皇明文衡卷之六十四

皇明文衡卷之六十五

碑

漢三老董公碑有序

徐一夔

予讀太史公書至三老董公說漢之事作而言曰三老董公
其秦漢間有道而隱者乎不然何其言之符機際會而粹然
一出於仁義道德也公之說漢高祖也其言曰順德者昌逆
德者亡兵出無名事故不成名其為賊敵乃可服又曰仁不
以勇義不以力至哉言乎不意文獻斷喪之後兵戈搶攘之
日有此人也蓋方是時項羽放弑義帝公以此說高帝討之
時高帝左右稱讀書如酈生不及此稱文學如叔孫通不及
此稱智術如張良陳平不及此而公獨及之意者公在草野
冥思天下之故項強而暴劉弱而仁莫有急於此者以故發

憤為高帝陳之不疑也公之始末史闕之即其言想其人必
秦漢間有道而隱者惜乎漢用其言而遺其人也爰敘而銘
之銘曰

秦政不綱義旗四舉紛紛藉藉孰為義主緬彼有道鴻飛冥
冥不聞其聲矧見其形倚嗟董公時止時作懷寶在躬不迷
而覺劉弱項強公有深憂討逆致順公有遠猷一言之出萬
鈞不拔什項與劉此機之發維此董公其執不倚維茲之言
允也其時公言既用公迹愈邈推公之蘊可興禮樂漢雖公
遺公言不墮公言不墮大道之維

漢紀信碑 有序

予讀大史公書至紀信以身代死之事作而言曰信之忠誠
一至是乎且信倨起之徒也當其事漢項羽圍荊陽漢危甚

王時欲存有降而尸降則漢事去信遂自為王降羽王因得
脫羽燒殺信吾意是吐漢事未定如信者不過苟相依乘以
饗富貴而忠誠若此何可得哉漢王既定天下嘗斬丁公以
勸忠矣而於信獨無贈典及太史公記載刺客如荆軻聶政
為之列傳說客如蘇秦張儀為之列傳刑名如韓非申不害
貨殖如卓王孫陶朱倚頓為之列傳至於殺身成仁如紀信
者乃獨不為之列傳遂使信之大忠不白於天下後世而臨
危顧身者踵相接也爰敘而銘之銘曰
黃金可銷白石可磨將軍之志之死靡他一念之精如霆之
發視刃不銛視火不烈滎陽之圍漢累卵危委八尺軀全一
帝基死生之故夫豈易與興亡之決在此一舉捐軀徇國有
若斯人緬想先烈莫之與倫

予讀太史公書至齊王蠋不屈之事作而言曰為臣死忠臣人律令也士不與焉蠋嘗諫齊王不從退耕于野未嘗居齊之位食齊之祿則齊之士也一旦燕人破齊走王而七十餘城俱下守城之臣非不多也不逃即降爾未聞一人為齊死者當是時濟王已死蠋猶區區為齊守書燕人使謂蠋曰燕人高子之義將以子為將封子萬家否且屠邑蠋謝曰忠臣不事二君烈女不更二夫經其頸於樹枝自奮絕脰而死攷其事與伯夷相類蓋伯夷孤竹君之子讓國而逃非有位者武王伐紂天下是之伯夷非焉殷既滅矣而猶恥食周粟猶蠋志也伯夷之事罕而見稱於孔子其道光明王蠋不幸不逢孔子太史公僅附於田單傳尾而稱說者鮮爰敘而銘之

銘曰

猗歟先生國之楨士之特也志弗隨以貞矢金石也眾反顧以生行不惑也執義之兵返仁宅也固然獨行匪矯激也休有烈聲軋亂賊也我揭其英髮上直也

商巫咸祠碑

張孟兼

惟書曰在太戊巫咸又我王家又曰在祖乙時則有若巫賢巫賢巫咸子也則巫咸父子世為商輔相矣而巫咸尤見諸子百氏書夏邑有山曰巫咸頂志以巫咸隱於是為名頂故有巫咸祠惟遺甃焉而莫知其所始山麓有廟尋廢蓋宋崇寧間邑大旱禱巫咸而雨請于國賜封王號見斷刻云洪武八年冬縣令閻育等即其頂作新祠而以巫賢侑惟巫咸古賢臣也生而為治功在王室歿而為神澤及後世矧能出雲

爲風雨而民以望歲者望之其可謂虛也矣是宜食享其土
不誣乃爲作迎享送神詩使敬祀之而亦以記其成焉詩曰
巫山兮巉巖神隱兮中巖神去兮千古盍瞻兮我土神化兮
爲雨風雲兮上下吁我民兮匪神何怙山雲兮浮浮神宅兮
山之幽神降兮我留於薦兮我羞我享兮以雩匪鐘鼓兮爲
娛吁願我民兮不渝神孚兮何之風雨兮其馳神我兮不違
我望兮以思吁樂年歲兮惟神自茲

梅長者祠堂碑

方希古

天地至和之氣時得之而爲春日得之而爲煦風得之而爲
薰皆所以長養萬物其化至密而其用至醇其在天德也則
爲元其在人德也則爲仁爲至善之德爲醇厚之化爲無言
教備其理者在唐虞爲八元在周爲仁人在漢始稱長者

其取義以爲能長育人材先躬行而尚本質有長盛昌大之
道故善治天下者必貴之漢侯之大臣進塞侯張歐皆以長者
稱因其行而求之若曹懿任次之清淨寧謐萬石君之父子謙
謹不諱丙丞相之居德不代以要皆長者之選長者之爲用迂
而不曲緩而不滯寬大忠厚得聖人之度人主能用之者其
國必興後嗣必蒙其利非若才智之士淺而易窮也彼子才
然而露其智術任之以事終成錯出非不可喜然刻薄少恩
行法無餘意而虐民無隱情喜之者未終而厭苦之者衆矣
若商鞅之於秦王猛之於齊氏曾未旋踵而太亂作豈其才
智之不足歟長厚之道微而人不懷其德也故天下可以無
才能之人不可以無長者不幸而乏才能焉事不過於廢弛
不幸而無忠厚之長者其誰恃而不亡乎長者之用梁肉也

才智之效藥石也吾以所聞所見推之國有忠厚之治者後必不衰家之久存而不墜者必長者之子孫台之寧海有梅氏考之圖譜昔有韓盛字昌圖者仕晉爲章安令擢南昌別駕知晉將亡卽是邑而隱焉常誦佛書旣而有靈鳥降其所居之側若諦聽者歲餘始知郡縣以爲鳳集上其事宋文帝聞而下詔褒之上表稱謝曰此殆覺陛下之德耳臣何與焉帝咨嗟稱爲長者仍命郡縣闢其所居舍爲丹丘寺云今八百餘年矣其子孫衆多爲邑巨家而寺亦不廢宋淳祐中諸孫之學佛者良阜建重閣像而事之歷年雖久而未有記其事者夫以劉宋立國未數十年而宗社爲墟長者之傳今十載而猶未艾此其所爲之可憊豈特一言之善哉宋文帝知其爲長者而不知長者之爲用國之不壽也固宜而長者之

澤至於子孫而益著矣天之於善人其所施甚遠矣祠而奉之非特高夫尊祖之思使聞長者之風者却去浮薄而趨忠厚豈不足爲天下之勸乎然則長者雖不獲如塞侯等之有益於當時而其遺澤之所及未始不同也乃爲詩以系之詩曰

中世取士貴乎才智巧僞如雲非國之利無言而化不爲而成長者之功沛然難名漢祀四百將相多有匪任長者其何能久如山之常如地之容不震不騰涵以雨風或乖于時世不能以澤鍾厥家千載祚社有晉之哀懷於墓臣先生恥之高蹈海濱行脩于身閭里咸化靈鳥降祥自天來下璽書旌門惟德是嘉曰匪于躬邦家之華有而弗居天下儀式錫之嘉名江海動色上下百世作者幾君其誰于今尚有子孫列

堂森森衣冠奕葉孰能祐之長者之澤爲善無位所係則長
若惟尊崇卒取危亡有嚴祠官浮屠攸宅歲時蒸嘗子孫千
百輔德于天爲善惟人載其淳風民俗是敦

蜀王廟碑

古之享天下萬世祀者必有盛德大烈被乎人人其或功蓋
一時名震一國祀事止於其鄉而不能及乎遠惟漢將關侯
雲長用兵荆蜀開國統未復以身死之至今千餘載窮荒遠
裔小民稚子皆知尊其名畏其威懷其烈而不忘是孰致然
哉蓋天地之妙萬物者神也神之爲之者氣也是氣也得其
靈奇盛著則爲偉人當其生乎時揮霍宇宙頓挫萬類叱電
噫風雄視乎舉世故發爲忠義之業巍巍赫赫與日月並明
與陰陽同用不幸其施未竟鬱抑以沒其炳朗靈變者不與

衆人俱泯則復爲明神無所不之固其理也人多謂侯特
夫之勇非有損益於世此非知侯之心者當侯之時勢莫完
於曹操力莫強於孫權昭烈敗亡之餘削弱爲特甚操欲誘
侯爲己用毅然不從權欲爲子請婚罵辱其使如狗彘左右
昭烈誓復漢室此其忠義之氣固足以服天下豈持一世之
雄哉使侯不死與孔明戮力孔明治內侯治外漢賊可誅
孫氏可虜而高祖之天下可復矣然則侯之存豈惟蜀人賴
之海內實賴之無成而卒非惟蜀人痛之凡嘗爲漢民者皆
宜爲之悼惜也感之深思之久事其在天之神以致尊慕之
心而不廢豈非出於天理民彝之正也哉寧海故有侯廟邑
人虔奉如侯尚存咸願紀德刻之牲石俾永世無惑詞曰
炎光中滅寰宇分奸雄鉅猾背敢吞穢腥上聞帝爲輦大統

重界高皇孫救令神人下天闔虬髯虎肩面赤瑠寶刀白馬
提三軍驅斬羣盜如狐豚扼荆取益聲勢振東吳喘恐睨且
蹲中原萬里殺氣昏意欲掃蕩無留痕厭世倏忽棄厥勳神
靈在天燁若暎奉帝之命施威恩旌善誅惡康黎元孫曹兇
虐罪不原羈鬼號呼遭割焚孰若我侯久愈尊海內廟祀莫
敢設春秋薦獻羅庭門酒芳牲碩簫鼓喧侯乘飛龍雲駢軒
萬騎扈從持旌旂來如飈馳去星奔惠民以實不以言嗟哉
我民慎潔虔懋德致福無尤愆德涼媚瀆神不餐至理甚昭
千古存侯神行世同乾坤

敕建元衛國忠肅公廟碑

劉三吾

洪武二十一年夏五月

皇上御奉天門召翰林學士臣鎬三吾謂曰朕冀命工曹

鼎新百神祠于欽天山之陽在元季有南臺大夫福壽效忠
以死宜全唐是方今本部尚書秦達奏唐已告完碑已齎就
請文鑱之以壽求久臣三吾職在紀載敢不欽承

上命謹按大夫諱福壽唐元民幼倜儻有大志知讀書既長
入備環衛積勞授長寧寺少卿累官至全知樞密院事當元
至正辛卯潁川兵起事聞首其君方清暑上京廷議欲駟奏
以俟命公持不可謂比得請還事將無及矣即親部分將士
調往討之然後以聞順帝嘉其處置明年改授宗正府也可
札魯勿赤以江淮警急尋除淮南行省平章政事至則濠泗
已失公日益圖備禦而上游兵勢方熾乃嚴程築石頭斷江
面且戰且守坐固人心會集慶告急拜公江南行臺御史太
夫臺治孤危所仗湖廣平章阿魯輝一軍為聲援而部下皆

苗兵翻肆暴掠阿魯輝者旋亦見殺退軍于杏花村高郵廬
和等州相繼失守內乏糧儲外無兵援公料簡民丁壯者爲
兵富者出粟嬰孤城自守丙申春三月

天兵至臺軍屢戰弗利度不能支盡閉諸城門惟開東門通
出入未幾城陷官民四潰公獨據胡牀坐鳳凰臺下指麾左
右若將有爲或勸之遁去厲聲叱曰吾臺端重臣城存則生
城破則死尚安往遂死其所郡達魯花赤達尼達思不忍棄
去亦死焉

皇上素聞公名命軍中物色以死聞嘉歎久之賜棺槨斂葬
如禮其朝聞之褒贈金紫光祿大夫江浙行省左丞相上柱
國追封衛國公謚忠肅嗚呼公爲不負臣節矣竊嘗慨歎自
元叔世奸臣擅權其內藩將失律其外天下幅裂日底于

公河西人也當臺城孤危于不可爲之昔厲不可辱之節比
天命有歸所志弗遂則慨然捐軀以死曾無難色非曾中有
定見者其能然乎眎彼平日門閥自高華楚自將坐則議論
風生前無古人至此則皆斂裳宵逝忠節無聞其于公賢不
肖何如也欽惟

皇上得臺城首表大夫之死得安慶復表余闕之死皆俾廟
食以厲臣節

皇上是心周武王封比干墓之心惟大夫廟故在城南土門
岡市閩閭非官民揭虔所故今徙是方與諸神聯祠廟庭廡
門輪奐一新繚以垣牆樹之杉竹是使公之忠槩與欽天山
全其截業公爲不徒死矣爲人臣者登公之廟拜公之位得
不有所觀感而興起乎繫以詩曰

侃侃衛公仗厥孤忠守此江東
天兵聿臨弔伐是心久旱而霖元有蓋臣見道之真如公罕
倫桀犬而信各為其君豈顧堯臣 堯仁如天表以墓阡廟
以揭虔惟闐闐中往來憧憧感動 宸衷欽天山陽厥土燥
罔造祠是方聯諸庶庭煥其丹青公此妥靈享祠山巔與
國縣延億萬斯年

皇明文衡卷之六十五

皇明文衡卷之六十六

碑

皇明黔寧昭靖王祠堂碑

王景

德足以昭三辰勲足以靖四垂故能翕張皇猷揮霍幅員乘
大化以控搏與天地而俱存生為人豪歿為明神理之常也
是以先王叙功以作元祀也非惟褒德顯忠蓋亦示神而明
之之誼焉若馬援之於漢張仁愿之於唐審典赤之於元其
人雖死其功烈在人千載一日語云大功必百世祀茲其近
之有若黔寧昭靖王之茂實比之數公實有過焉尸而祝之
斯古道也夫
聖人出而大命集必生應昂降岳之佐以開其休時維我王
初隆天造受恩

帝室年十有八出鎮鎮江綽有聲績內託肺腑外秉節旄以
麾諸夏南平閩越擒陳友定以材畧見知于
上同知大都督府事幾十年所奏無一不當

帝心者西畧崑崙涉流沙轉戰千里皆生擒其渠帥平二十
餘萬落封西平侯功在盟府率兵南征深入不毛撤牂牁
夜郎徑安定鞞烏蠻大戰曲靖擒元司徒達理麻梁王把匝
刺瓦爾密走死不決十辰遂開雲南車里八伯平緬皆虎視
以雄莫不嘔咿僮俚稽顙效臣順明年諸部覘王師之東也
曰予復叛兵二十萬蠶屯蟻附城幾不支王聞勒步騎至自
芒賊愕遂潰自相輾逆伏屍填道雲南底平悉致其酋帥
京師勲莫大焉在鎮十年以仁智為理闡庠序以示之禮迪
官常以示之制均政役以厚其聚以旋定安集為已任其桀

狝我王度則差馬拱稽卓雉而禽獮之牯阿資燿者滿壘
矣情慶定邊凡斬首數萬捕虜過當王垂涕而遣之諸部懷
仁服義始豫附以和收其馬牛金銀丹漆杭稻以充軍實雖
遐邊習聞皆覩天日之明道德之華自王迪之也山川草木
桐生懋豫與嘉賴之德莫懋焉及薨軍民罷市巷哭至有勞
高者 朝廷嘉之追封王爵恩至渥也民夷念王不置合辭
請于 朝建祠報可裨王之于今西平侯纂其任從民理也
按祭法古之通祀者五曰法施于民曰以勞定國王兼而有
之載祀百世此其肇歟祠作于薨之後二年九月某甲子成
于某月某甲子凡為楹若干行馬列戟不侈不踰遵
憲章也既成享咸請紀于石以垂無極不獲辭因作迎享送
神之詩俾歌以樂焉

大明麗天萬國明赤苻飛騰策六丁惟玉翊運天降精身薄
日月騎斗衡坐張天弧檻攬搶助

帝駟伐基隆平氣壓崑崙蕩滄溟出入星緯無留行勁涉滇
海縻長鯨長鯨既剝波浪腥龍蛇走陸殺氣橫噓陽吹陰孰
敢嬰文經武緯光晶熒手揭元會歸 虞壬上騎箕尾為列
星

帝錫侈封王黔寧河山帶礪分漢盟堂堂遺像夾兩楹神光
夜夜飛爽靈彤壑布瀉通杳冥焚麗颯沓從兩旌倏焉如雲
搏紫清八衝鏘然韻流鈴春秋報事垂千齡

勅建神木山神祠之碑

胡廣

皇帝統御天下愛養黎元恩惠優渥首飭羣有司毋擅用一
夫取一財於是生養休息日庶日富比年歲登民和海宇熙

洽及永樂四年秋詢謀於羣臣曰六者建都必營宮殿朕肇
建北京恢弘舊觀以永詒謀顧興作事重惟恐煩民然不可
後僉曰

陛下慎卹民力視之如傷而民皆樂於趨事

皇帝曰尔往試哉乃命入山以伐材焉用民力十取其一給
以廩食歸其傭直而民欣然鼓舞不知其勞故事不程督而
集工部尚書臣禮取材於蜀得大木於馬湖府圍以尋丈計
者若干踰尋丈者數株計庸萬夫力乃可以運將謀刊除道
路以出之一夕忽自行達於坦途有巨石巉然當其衝夜聞
吼聲如雷石劃自開木由中出無所齟齬度越岩險膚寸不
損所經處一草不偃百工執事顧視謹誦踴躍交慶事聞廷
臣稽首稱賀謂

聖德所致

皇帝辭以弗逮推功于山川之神乃遣官以牲醴祭之將至之先大雨洗塵山川草木預有喜色鮮澤榮華蔚然穠麗及祭之日先降微雨灑滌游坊俎豆既陳羶香彤纓雲雲倏消天宇澄湛明星煌煌月影交輝祥飈徐來神用居歆聞山呼聲者三震動天地神顯其靈於昭有赫遂封是山為神木山詔有司建祠歲時祀享以答神貺命臣厲為文以紀其事刻之于石臣廣頓首受命仰惟

皇帝功德高厚比隆天地妙運一心斡旋萬化陰陽鬼神隨機應勒脗合無違故凡有施為嘉祥沓至是以山川之神協贊貞符宣暢明靈濯濯洋洋休有烈光超達物表有不可以智巧測量之者然以理求之其可知已夫充塞兩間者鬼神

之功用若川泳雲游日烜雨潤風霆鼓動寒暑更迭歛陰忽陽變化揮霍其迹尤著然三辰順軌雨暘以時景星慶雲和氣克溢斯皆一心之所感召若夫木石非由人力不可以運動而乃潛闕默輸寔由

聖德感乎神明協應之所致也固非耳目見聞之可知已夫人之所不知不能者鬼神之所能也以人之所不知不能而測夫鬼神之能宜其有弗知也况凡天下名山大川奠於方域之中出雲雨產財用以資於國家其神固靈也而神木之山所產良材自萌蘖而長以至於拱把連抱神之衛闕呵禁以待於今日然則神之効其靈者非一朝夕也茲今之顯應所以兆

皇帝萬世悠久之徵則神之功其可以少哉稽之於傳凡有

功於國家者必有祭神功彰者實爲偉茂載之祀典於法
允宜臣廣再拜謹書其事爲記并系之銘以頌歌

聖德且以敷揚神休銘曰

皇帝受命統御萬方六合泰寧物乂民康端拱垂衣無爲而
治蠻夷荒服蟻附而至休徵之應如川如林至和感孚百靈
具歆壯哉北京

龍飛之所

帝用詒謀大啓厥宇慎卹黔首咨詢在廷庶民子來于始經

營

皇帝有詔取材于蜀神木之山岷峨是屬榎楠豫樟絜之百
圍神用呵闕以需于茲斧斤斯入林披薄斂凡厥所產悉呈
弗掩良材九九孔晏且碩載而輸之萬夫之輅層巒峭壁矗

矗崇崇深谷豁呀飛流怒淙有巖厥途其石截嶭徐步曳武
猶慮僨踣方謨夷險憑虛架梁人力未施木忽宵行越澗逾
壑砰磕如雷巨石礮礮隨擘以開維山有神維神昭靈默驅
六丁佑相

皇明神衷顯宣嘉徵斯應以兆

皇基萬世永盛報神有典祀事孔宜爰作新廟歲以享之醴
清牲腍籩豆淨潔肴羞維旅殮蕝有苾春蘿蔚陰秋菊垂芳
裸薦以時禮儀有章執事駿奔秉虔以對濟濟鏘鏘罔敢或
懈神之來享驅霆駕風翳以鳳凰騃以虬龍靈旂揚揚神旣
降只鼓鍾鏗鎗神醉以喜神永宅茲時雨時暘眷此邦氓易
診作禳

皇德同天幽明畢被剗制靈祠以誌神祀礪石刻銘茲山寔

侔頌宣

皇德永著神休

勅建禮部賜宴之碑

楊士奇

宣德六年十月北京新作禮部成尚書胡濙奏請樹石刻文以示久遠制曰可其文以命臣士奇臣既拜受命謹按禮部在唐虞為秩宗在周為春官大宗伯所典天神人鬼地祇之禮而禮樂庠序風化制度品節之事咸屬焉我國家

列聖相承法古制治尤重於斯

皇上臨御之初茂簡俊乂以稱厥任時濙以禮部左侍郎兼南京國子祭酒奉命還禮部數月陞尚書

上諭之曰國家所重祀事朕夙夜祇奉天地宗社暨于爾神

以迓福生民爾其懋相予無怠凡國所用彝典爾推舊章是循是式用佐予理無忽爾惟寅推清用懋副朕命濙拜稽首言臣敢不精白一心以圖稱萬一蓋

上所命濙與虞舜即政命伯夷者同一道也而嗣

大位以來祀享受福川嶽奠寧歲屢豐登田里給足災沴不作遐裔畢來禎祥之物駢見疊至皆本於

皇上誠敬所格而德化之效也于時北京創建未久百司官府皆未作其公署及治文書之舍率就簡便蓋未暇及也一日濙奏事殿中

上曰國家大典禮悉隸禮部非可以簡其官府宜先備

勅工部作之度地於大明門之東西向中為正堂堂之側為司務廳前為周序為中門為前門正堂之後為後堂左右為

賓客之位後為庖庫堂序之外為四屬儀制主客在左祠祭
精膳在右鑄印在中門之左其地充爽其材堅良高明邃深
制度弘偉方之近代綽乎過焉既成以聞 命京師諸司長
貳咸往落之 命光祿賜宴 恩澤之隆羣情歡溢咸謂
皇上博典庸禮啓自 宸衷始作斯宇甚盛舉也臣惟禮者
天理之具於人事而行之以敬者也用之事神而神享用之
為政而政修用之教化而教化孚用之制作而制作盡善故
禮所以為 國家天下之大器不可一日無者而典之必得
其人惟

皇上知之明而行之果也然臣伏覩未作禮部之先有司以
上所居宮殿庫益請拓地改作
上曰朕方捲捲息民為心居室豈今所急却其奏既而出

璽書命諸司詢民瘼施振貸已逋責暨 即成有司復請民
作宮殿且言治材已具

上曰朕夙夜求民之安今天下匹夫匹婦豈皆得所而何暇
於自求佚若等宜體朕卹民之心敬哉勿忘又却其奏而出
璽書敷布德恩存卹鰥寡招懷流徙且飭有司蠲弊舉廢修
懷保之政蓋 聖仁一念保民惟日孜孜昔大禹薄自奉而
所勤者民之事所致飾者宗廟朝廷之禮與
皇上聖心異世而同符猗歟盛哉是役也重禮為先務而再
却有司之請 聖德之大者臣忝職史氏謹備書之而繼以

詩曰
稽昔帝王禮莫重焉天叙以勅人文以宣其用之嚴曰郊與
廟教化制作咸禮之要

皇明龍興

列聖御極盛德光華有典有則

皇帝繼統躬禮道民從容安行天下歸仁翼翼北京視周之
鎬桓桓六卿羣辟之表有虞秩宗咨命伯夷

帝謂臣濙往哉汝諧肅肅三禮汝祗相予凡百儀度汝慎攸
司爰初經營六官之府

帝謂臣濙權輿宜汝龍章自天臣工祗率力齊材良成之不
日 天闕之南端門之東輪焉奐焉闕廓穹崇維

皇明聖以禮為國維明維果有此弈弈維孝維恭大禹攸同
約已勤民菲食卑宮矜卹無告惠鮮鰥寡文王濟心日不遑

遐仁澤流霈源源弗窮悅懌歸赴如川之東禮序樂和化淳
厚龜龍在沼麟鳳在藪體信達順維

聖之功執事有恪維臣之恭夙夜其勤式告有位維寅維
以熙

帝載

君山廟碑

君山廟者祀常州府同知張侯之廟也為政而能愛民生則
父母之沒則烝嘗之皆由其誠有以致之也張侯之司知常
州也奉部符專督農事既至視民如子喜為之興利常行視
水教之蓄泄躬履壟畝察種植而為之勸或時坐堦間相爾
汝語如家人未嘗笞詈辱人遇老病鰥孤率有恩意所過飭
勸學校正士習民甚戴之上官知其得民也有所賦輒擻之
督民恐以緩累侯則爭起趨事然侯終不以慮譴而急民是
時天下軍伍滋弊軍之姦黠者率用賂規匿而詭傳平民於

籍民被枉比比

朝廷以璽書分命御史清理其要在覈奸直枉御史當詣蘇常者言於兵部常州必得張同知共事乃有濟部遂以檄侯御史時銳意得軍為功不復矜念民枉侯固執民實非軍敢違璽書不從御史不可柰何數出無禮語詬詈之侯忿鬱不能平數日疽發背卒然常之人賴侯以免於枉者猶十七八時蘇之佐郡者極力助御史得軍而枉民動以千計愁苦嗟怨於道路累年不解常之人以是益思慕侯不已侯素澹泊廉介不苟取一毫自入仕未嘗以家累隨公退坐一室蕭然讀書焚香而已易簪之先夕侍藥者入其舍索燈燭悉無翅出取膏油一盃以入侯遙見竟謝卻之其操類此侯先自翰林庶吉士為刑部主事春坊中允大理寺丞皆有政績嘗奉

命督事廣東福建皆有惠及民此特載其在常者耳侯卒之日民老壯奔走哭於庭皆哀具儀奠祭累日匱行白衣冠送者數千人非積誠而能致此乎後數年江陰士民朱善繼善慶周孟德孟敬因衆民之志協謀作廟於邑之北君山以祀侯來請書于石併作迎享送神之詩使歌以將事侯名宗璉字重器江右吉水人永樂第一科進士朱氏周氏皆尚德崇義之家詩曰

肅穆兮侯堂酌山泉兮薦林芳泠泠風兮髣髴侯戾止兮珮玉瑲懷仁侯兮撫我動與息兮有教稼芄芄兮連疇侯顧我兮樂以笑侯乘兮蘭棹條東臯兮忽南畝溪有鱣兮陸有虺侯赫視兮敢余民侮侯來遲兮逝何疾侯之逝兮我民以戚山之明兮水之麗侯捨茲兮安適侯懷故鄉兮旦往夕來祚

我佑我兮無遐遺調二氣兮平四序下無汎濫兮高無曠災
沼有魚兮豈有畜公無負逋兮私庾足我民兮子孫孫子承
侯福兮千百世祀

重修開平忠武王廟碑

王直

正統十二年秋八月通州守臣李經言州城東南隅舊有廟
以祀開平忠武王常遇春蓋洪武三年奉勅建每歲春秋
守臣以少牢行禮庭下載在祀典今八十年矣脩治不繼日
入於弊懼無以稱

朝廷崇德報功之意請繕完如法 制曰可命工部聚材鳩
工撤而新之通州諸衛及州所屬縣各以丁夫給役且命總
理通州諸務都指揮僉事陳信兼督之命既下文武吏士奉
命謹材不徵而集工不召而至智者效謀壯者效力詐正

